

NIGICOA GONIOTAGODI JESUS ANE IKEETE JOÃO

Nigica João naga idí nagadi notaganagaxi, nigicoa nokododi loiigi Goniotagodi eliodi moiatetibece inatawece iigo. Eliodi anonigodi, icaeledi bogoniwilotiniwace. Nigicoa nokododi João jogoxiigodi, odaa jogoyokoleticogi minitaga lidelocawaanigi anodita Patmos leegodi me yatematitedibece nibodicetedi aneetece Cristo.

Liwigo Aneotedogoji eote João mijoa icoa lakataga micataga daga ligeedi. Nigica naga nadi icoa lakataga, Goniotagodi Jesus ja dinikeeteta, odaa ja iige me didikotibige icoa seete lapoli loiigi Cristo. Nigidiaagidi João ja nadi lapotibece ica anodogetetibige Aneotedogoji iniaa Goniotagodi Jesus. Nigidiaagidi João ja nadi icoa aanjotedi anonadeegitedinigi iigo icoa nawikodico Aneotedogoji anicota me niigetedini digoina iigo nigica nige owidijedi nokododi leegodi libeyacegeco oko. Codaa aagaga nadi Aneotedogoji anigotediogi diaabo, inaaginoa niwicidi abeyacagaga, codaa me nigina oko anidioka limedi me nakapetegi Aneotedogoji. Nigica owidijegi ane nadi, nadi ica gela ditibigimedi, icaagica gela iigo, acaagaca gela nigotaga anodita Jerusalém Aneotedogoji ane yoetetema loiigi. Ane leegodi João me idí nagadi notaganagaxi leegodi me yemaa meo loniciwaga me datitetiniwace nigina minoa ane dakaketema, codaa me datitetiniwace me degeyamagaticoace meniwigatakanaga, leegodi moyowoogodi Cristo naga igeke inoatawece ane beyagi. Leeditibige monalagatibige nigicoa anele ane yajigotediogi Aneotedogoji nige dopitedijo Jesus.

Diniditelocono nagadi notaganagaxi nigica anodaageeteda nigicoa owidijedi nokododi

1 Diniditelocono nagadi notaganagaxi nigicoa Jesus Cristo ane ikeeteta João. Aneotedogoji ikeete Jesus Cristo, eotedibige magaga ikeetediogi liotagipi nigica ane dagadiaa leegi odaa jigicota me jinataga. Goniotagodi Jesus Cristo iige niaanjo me ikeeta João nigijo liotagi Goniotagodi, eotedibige me yowoogodi anodaageeteda nigicoa ane icota me jinataga ganigida noko. ²Odaa João yatemati icoatawece nigicoa ane nadi. Odaa maditaga nagadi notaganagaxi diniditelocono nigica aneetece lotaga Aneotedogoji, nigica Jesus Cristo ane ikeeteta João. ³Aneotedogoji ibinie nigina ane yalomegetemaeledi oko nagadi notaganagaxi, codaa ibinietediogi nigina anowajipata codaa anoyiwagadi lotaga nagadi notaganagaxi ane ikee anicota me igote Aneotedogoji nigicoa owidijedi nokododi. Leegodi ja nipegi micota ane diniditelocono nagadi notaganagaxi.

João yecoaditece icoa seete lapoli loiigi Aneotedogoji

⁴Ee João ane jidi nagadi notaganagaxi, jidikotibige seete lapoli loiigi Goniotagodi ane ligeladi nipodaga Ásia.

Jemaa Aneotedogoji midioka limedi meletedagadomitiwaji, codaa meote mele gadaalegenaliwaji. Ane yoetagadomitiwaji nigida, Aneotedogoji, Nigijoa aniniwa, anakaaginiwa maleedigicatibige me godoe, codaa micota menagi digoina mokotaga, codaa meletedagadomitiwaji, codaa idi eledi anoyoetagadomitiwaji nigijo anele, nigijoa seete niwicidi ane idei lodoe nibaanco Aneotedogoji. ⁵⁻⁶Codaa iniwa eledi idioka limedi meletedagadomitiwaji, Jesus Cristo, anidioka limedi me ikee anewi idaagida me dawikode. Jesus Cristo dagaxa me gonegegi catedi nigina eledi ane newigatace, codaa me iige inionagatigi nigina iigo. Ijaagijoa godemaa, codaa godapitagaditetema gobeyacegeco leegodi me nadoogodi lawodi. Eote moko dinoiigiwepodi codaa iige godaalegenali. Najigotedogowa, anoko loiigi, mida gonagatetigi me jiboonagatio eledi oko lodoe Aneotedogoji, ane Eliodi Jesus. Leeditibige midioka limedi me jelogotaga Jesus Cristo me dagaxa me gonegegi, codaa mida nagatetigi codaa mida loniciwaga. Odaa jigidaagee. Amém.

⁷Digawini! Ikota menagi niotedinece loolatedi. Inatawece oko onadi, codaa me nigijo anoyacilotidi. Inatawece noiigi noenagateloco leegodi lanokegi Jesus. Odaa jigidaagee. Amém.


⁸Goniotagodi Aneotedogoji aneliodi loniciwaga, aniniwa, ane akaaginiwa maleedigicoa niginoa aninoa, codaa icota menagi mokotaga, meete, “Ee odoejegi codaa Ee mowidijegi, igaataga jegemaga jaote inoatawece anakaaginao, codaa icota me jigodi inoatawece.”

Jesus Cristo ane diigenataka dinikeete João

⁹Ee João, ee ganioxoatiwaji. Leegodi me godexogotege Cristo, jawikodeega nigina me jatematiiga Jesus Cristo me goninionigi-eliodi. Codaa me idinatiigatalo niginoa godawikodico. Ee idiniwilo digoida lidelogo Patmos leegodi me jatematitibece Aneotedogoji lotaga, ane nelogoditedogowa Jesus.

¹⁰Odaa nigijo noko me noko Goniotagodi, Liwigo Aneotedogoji ja dakatiwigiji. Odaa ja jajipata ica ane idei digoina yowidi ane igedi me dotaga liciagi layaagegegi goloneeta. ¹¹Aneetiwa, “Ee odoejegi codaa mowidijegi. Jegemegee ane jaote inoatawece niginoa aninoa, codaa icota me jigodi inoatawece. Idiiteloco notaganagaxi niginoa ananati, odaa iwakateenitibige nagadi notaganagaxi midiwataga seete lapoli loiigi Goniotagodi ane ligeladi manitaga nigotaga Éfeso, Esmirna, Pérgamo, Tiatira, Sardes, Filadélfia, Laodicéia.”

¹²Odaa ja inawiilitetege me jivi nigica ane idotaganenege, odaa ja jinadi seete noledagaxiidi oolo. ¹³Liwigotigi nigidiwa noledagaxiidi jinadi oko latopiwa nigijoa Goneleegiwa ane icogotibigimece ditibigimedi. Dinixotinigi nijayogo ocagataga anenotinece negepaa logonaka, idiaa nigoenagadi oolo yakaogotigi natecogodi. ¹⁴Lamodi dagaxa me yapacaga liciagi gotamogo.



(Apocalipse 1.12-20)

Ligeooge idi me datale micataga nigina galewaga. ¹⁵Logonaka liciagi aca “bronze” anoyalegi moyaago, odaa jogoigixidi moyatalagadi. Lotaganegegi igedi micataga nigina layaagegegi nigina ninyogodi ane daxoꝓoke.

¹⁶Nolitedini seete yotetitedi. Idaa nodaajo-ocagataga ane dalepe idoatawece liwailidi icogotiwece nioladi. Latobi datale macataga naligege yaxoꝓo-noko.

¹⁷Naga jinadi, odaa janitiogi logonaka micataga émegegi. Pida dibatediloco, odaa meetiwa, “Jinagadoii! Ee odoejegi codaa mowidijegi. ¹⁸Ee Nigijoa ane yewiꝓa. Ideleo, pida nigina natigide idioka limedi me idewiꝓa. Odaa jigidaagee. (Amém.) Iciagi nigina oko anida lakabakenaganagadi leegodi mida nagatetigi, ida yoniciwagateloce néмага codaa aneiticoace émagaga. ¹⁹Enice idiitedi niginoa ananati natigide, codaa anicota micotece. ²⁰Jigijjo me dinagaditedini, agica ane yowoogodi anodaa diitigilo nigijjoa seete yotetitedi ananati ibaagadi ijaagijjoa seete noledagaxiidi oolo. Digawini anodaa diitigi nigijjoa seete yotetitedi, niaanjotedi nigidiwa seete lapoli loiigi Goniotagodi, odaa nigidiwa seete noledagaxiidi, бага nigijjoa seete lapoli loiigi Goniotagodi.”

Nigeꝓi ica lapo loiigi Goniotagodi ane ideꝓi manitaga nigotaga Éfeso

2 ¹Odaa meetediwa,
 “Idiitema niginoa yotagatibige niaanjo lapo loiigi Goniotagodi ane ideꝓi manitaga nigotaga Éfeso, lotaga Niginiwa ane nolitedini seete yotetitedi codaa anigotedigi liwigotigi nigidiwa seete noledagaxiidi oolo. ²Ejitagawatiwaji jowoogodi ane gadoenataka. Jowoogodi meliodi mabaa, codaa madinatiitalo niginoa ane dakaketagadomi, codaa me dagakati madinatiitiogi oko abeyacagaga anidi gadiwigotigitiwaji. Jowoogodi madineenitiogi nigijjo anodi me liigexegi Aneotedoꝓoji pida agewi, odaa jaganati me awitakagaga. ³Jigixomagateenitedijotiawaji gadawikodico, codaa meliodi mawikodee Ee leegodi, pida agica dagakaami agecagalodipi.

⁴Pida ida ane jinaditagadici nigida makaamitiwaji, agaleegademaani daga liciagi nigijo jotigide maleekoka ademaani. ⁵Odaa jipokotagawa manalakitibigetiwaji anodaageni maleekoka ademaani, adinilaanitece nigida gabatiigitiwaji, odaa awiitace nigijo anenitiwaji jotigide. Nige daga adinilaanitibecetiwaji, janagi, odaa inogatice gadoledagaxitiwaji miditaga ane limedi. ⁶Pida ida aneletagadicitiwaji. Gadelatema loenataka nigijoa ane liboonagadi ‘nicolaítatedi’, aneji me idelatema.

⁷Ane yemaa me wajipa, dice ajipaata ane ligegitiogi Liwigo Aneotedogoji nigidiwa lapoli loiigi Goniotagodi! Nigica ane igeke ane beyagi, jajigota me yakadi me yeligo ela nagada niale aneo lewiga oko ane yeligo, nagada niale ane idei midiwa lawodigijedi Aneotedogoji.”

Nigegi ica lapo loiigi Goniotagodi ane idei manitaga nigotaga Esmirna

⁸Odaa meetediwa,

“Idiitema niginoa yotagatibige niaanjo lapo loiigi Goniotagodi ane idei manitaga nigotaga Esmirna, niginoa lotaga Niginiwa anodojegici codaa mowidijegi, Niginiwa ane yeleo, pida ja yewigatace. ⁹Ejitagawatiwaji me jowoogodi ane gadoenataka, codaa ane gadawikodigi, codaa jowoogodi makaami madewetedi. (Pida digoina meetaga idiwa ganillicagajeteciditiwaji). Codaa jowoogodi niginoa ganotagatiwaji liwitakeco nigidi anodi me judeutedi, pida agewi me judeutedi. Pida ida aneetege liiakanagaxi Satanás. ¹⁰Jinagadoiitege gadawikodico anenagi. Digawini! Diaabo eote liwilogojedi nigina akaamitiwaji, ixotiwece niwilogonagaxi, etigadicinitiwaji. Odaa awikodeetiwaji deez nokododi. Pida jipokotagawa midioka limedi madinakatonitiwaji, icaagica degetigadeloatitiwaji (leegodi maniwitici), odaa jao ganogeedi me gadewikitace, macataga nagana lale nigina oko nalokodegecajo, naga dinigaanye.

¹¹Ane yemaa me wajipa, dice ajipaata Liwigo Aneotedogoji ane ligegitiogi lapoli loiigi Goniotagodi. Ane igeke ane beyagi me digica degeyamagaticoace, nigidi nige newigatace, odaa anawikodeega migetaga nigo (nige limedi me iloikatidi Aneotedogoji nigina oko leegodi libeyacegoco).”

Nigegi ica lapo loiigi Goniotagodi ane idei manitaga nigotaga Pérgamo

¹²Odaa meetediwa,

“Idiitema niginoa yotagatibige niaanjo lapo loiigi Goniotagodi ane idei manitaga nigotaga Pérgamo, niginoa lotaga niginiwa anida lodajo-ocagataga ane dalepe idoatawece liwailidi. ¹³Ejitagawatiwaji me jowoogodi ane gadoenataka, codaa jowoogodi ane gadigeladi, anei me diigenataka Satanás. Jowoogodi midioka limedi maniwiticitiwaji me digica mikani gatiwagatakanegegi, idaagida nogoyeloadi Antipas, nigijo ane dawikode leegodi mee me niotici. Lemagadi digoida ane ligeladi Satanás.

¹⁴Pida ida ane jileetagadomitiwaji, leegodi idi oko gadiwigotigi anodioteci liigaxinaganegegi Balaão, ane iigaxitece Balaque anigota me ibatakatidi loiigi Israel nigijo jotigide. Diigaxinagatece moyakadi moyeligo niweenigi anoiboo moiwenigide niwicidi, codaaeledi diigaxinagatece me yakadi me dinoomatewamigipi nigina ane daga dinodawamigipi. ¹⁵Odaa jigidaagenitiwaji idi gadiwigotigi anodioteci liigaxinaganegegi ‘nicolaítas’ (ane liciagi Balaão me diigaxinaga). ¹⁶Enice adinilaanitibecetiwaji! Nige dagadinilaanitibecetiwaji, natigidawaanigi janagi makaamitagatiwaji, odaa ja jakapetege nigina oko anodioteci nigijoa nicolaítas liigaxinaganegeco, jibake nodaajo-ocagataga ane icogotiwece inioladi.

¹⁷Ane yemaa me wajipa, dice ajipaata Liwigo Aneotedogoji ane ligestitiogi lapoli loiigi Goniotagodi!

Nigina anoigeke nicinigico, jajigotigi niweenigi ane digica me jinataga ane icogotibigimece ditibigimedi. Codaa aagaga jajigotigi wetikawaana lapacege ane diniditeloce boonagadi ane digica ane yowoogodi, iniokini nigini ane dibatege бага yowoogodi ane diitigi.”

Nigegi ica lapo loiigi Goniotagodi ane idei manitaga nigotaga Tiatira

¹⁸Odaa meetediwa,

“Idiitema yotagatibige niaanjo lapo loiigi Goniotagodi ane idei manitaga nigotaga Tiatira, lotaga Lionigi Aneotedogoji ane idi me datale ligecooge micataga nigina galewaga, codaa logonaka macataga aca ‘bronzé’ anoyalegi moyaago, odaa jogoigixidi moyatalagadi. ¹⁹Ejitagawatiwaji me jowoogodi ane gadoenataka. Jowoogodi madinemaanitiwaji, midioka limedi madinakatoni, codaa me jowoogodi gabaketedi anele, codaa madinatiitalo niginoa ane dakaketedagadomitiwaji. Jowoogodi mawiitiwaji catedi anawii nigijo jotigide. ²⁰Pida ida ane jileetagadomitiwaji, leegodi mikani gadiwigotigi lakataga nagajo iwaalo Jezabel, ane me yelogodi ane ikeete Aneotedogoji, pida agewi. Ane diigaxinaga codaa inaletiogi iotaka me noomatewaeledi oko ane daga lodawa, codaa moyeligo niweenigi anoyajigo moiwenigide niwicidi. ²¹Jajigota nimedi me dinilaatece libeyacegegi, pida ayemaa me ika me loomatewepodi oko ane daga lodawa. ²²Digawini! Jokoleteloco nipe nagajo iwaalo ijaagijoa loomatewepodi codaa me niginaeledi oko ane noomatewa, odaa eliodi me nawikodeega nige daga dinilaatece nigida libeyacegegi anowo. ²³Jinigodi nigina lionigipi, odaa inatawece lapo loiigi Goniotagodi oyowoogodi me negemegee ane jowoogodi lowooko, codaa me niginoa ane lemaanaga laalegenali oko. Odaa jajigota oninicebeci ina akaamitiwaji loojedi ane igenaga ane gadoenatagi.

²⁴Pida idieledi oko gadiwigotigitiwaji manitaga nigotaga Tiatira ane dogodioteci nigida niigaxinaganegegi ane beyagi, codaa agica dogoyowoogodi nigica anodita ‘Ica me niigaxinaganegegi gonegegi ane dinagaditi, pida liigaxinaganegegi Satanás’. Ejidaga jiwakateetibigagajitiwaji

gaantigica eledi ane jiigetagawa mawii. ²⁵Pida nigida anida makaamitagatiwaji anele, adowetiteloco, oteteni nigepaa janagi.

²⁶⁻²⁷Nigina ane iḡeke loniciwaga ane beyagi, codaa aneo ane jemaa nigepaa liniogo, jajigota yoniciwaga ane najigotediwa Eiodi. Odaa nigini oko ida nagatetigi me iḡe inoatawece ane noiika. Micataga daga datika laxacogonagadi ḡapilecege, odaa ninoketiniwace nigina oko abeyacagaga micataga nigina oko ane noyaagadi boote, odaa owidi liwailidi. ²⁸Jajigota yotedi-eloodo, nigoiije.

²⁹Ane yemaa me wajipa, dice ajipaata Liwigo Aneotedogoji ane ligegitiogi lapoli loiigi Goniotagodi!”

Nigegi ica lapo loiigi Goniotagodi ane idei manitaga nigotaga Sardes

3

¹Odaa meetediwa,

“Idiitema niginoa yotagatibige niaanjo lapo loiigi Goniotagodi ane idei manitaga nigotaga Sardes: Lotaga nigijo anidiwa seete liwiciidi Aneotedogoji minitaga, idiaa seete yotetitedi libaagadi. Jowoogodi anawii. Modi me ḡadewikitiwaji, pida ḡadiciagi niginoa émagaga. ²Enice anoleetice codaa oniciwagati anida makaamitagatiwaji, iḡaataga ja leedi me ma. Iḡaataga jowoogodi ḡabaketedi aigenaga lodoe Aneotedogoji. ³Enice analakitibige anodaageni maleekoka ajipaatalo yotaga codaa anodaageni mabaategetiwaji, odaa anoliitini anabaatege, codaa adinilaanitece ḡabeyacegeco. Nige dagadinenyagati, janagi makaamitagatiwaji micataga olicegegi, odaa agowoogoti nagaca lakata nige janagi makaamitagatiwaji. ⁴Pida idi ḡadiwigotigitiwaji oko digoida Sardes ane ḡogonapioyagaditeda nijayogoli. Nigidi oko icota me yawaaligagawepodi odinixotinigilo nowoodi lapacogogoli, leegodi me leeditibige moiwenigidetibigiwaji. ⁵Nigidi anoigeke ane beyagi, joanigidiaa inixomegetinigilo nowoodi ane yapacaga, codaa ainapitagadi liboonagadi maditaga notaganagaxi ane diniditeloco liboonagatedi oko anidioka limedi me newiga, ḡaleegica liniogo. Codaa lodoe Eiodi idiaa niaanjotedi, jelogodi me inepilidi nigidi oko.

⁶Ane yemaa me wajipa, dice ajipaata Liwigo Aneotedogoji ane ligegitiogi lapoli loiigi Goniotagodi!”

Nigegi ica lapo loiigi Goniotagodi ane idei manitaga nigotaga Filadélfia

⁷Odaa meetediwa,

“Idiitema niginoa yotagatibige niaanjo lapo loiigi Goniotagodi ane idei manitaga nigotaga Filadélfia: Lotaga Niginiwa anoiolatedice me dibatetema Aneotedogoji, codaa ane yakadi me jinakatonaga, Niginiwa anida lakabakenaganagadi anijo me íto Davi, lotaga nigijo oko ane yomoke epoagi odaa ḡgica ane yakadi me nibatoo, nige nibatoo, odaa ḡgica me yakadi me yomoke. ⁸Jowoogodi ane ḡadoenatakatiwaji. Ja jomoketagadomitiwaji epoagi ane diḡica ane yakadi me nibatoo.

Codaa jowoogodi mokatecigini gadoniciwagatiwaji, pida jogoteteni yotaga, codaa agica degenitiwaji me dagakaami inepilidi. ⁹Digawini! Nigidi ane nebi liikanagaxi Satanás, ane niwitakaga modi me judeutedi pida ajudeutedi, jao menagitibeci makaamitagatiwaji, odaa oyama gatedini lokotidi gadodoetiwaji metigadiwenigidenitiwaji. Odaa iditawece oyowoogodi me gademaanitiwaji. ¹⁰Leegodi me iwagatitiwaji iigenatakanegegi odaa adinatiitalo gadawikodico, odaa gadotetenitiwaji nigicota nagaca lakata nige inatawece oko nawikodeega, niginoa nawikodico enagi moici inatawece noiigitigi digoina iigo.

¹¹Digawini! Aleegi odaa janagitace. Otetenitagadomitiwaji ane ganebi bidige agica ane noga ganagajegi. ¹²Nigidi anoigeke ane beyagi, jao macataga nagana lawonaga ligeladi Iniotagodi Aneotedogoji, agica daga digike anei. Jiditeloco libikotaxedi Liboonagadi Iniotagodi Aneotedogoji codaa me liboonagadi nigotaga Iniotagodi Aneotedogoji. Nagani nigotaga jaganiaagani nagaca gela Jerusalém ane icogotibigimece ditibigimedi, icogotibigimece miniwataga Iniotagodi Aneotedogoji. Jiditeloco nigini oko gela iboonagadi.

¹³Ane yemaa me wajipa, dice ajipaata ane ligegitiogi Liwigo Aneotedogoji lapoli loiigi Goniotagodi!”

Nigegi ica lapo loiigi Goniotagodi ane idei manitaga nigotaga Laodicéia

¹⁴Odaa meetediwa,

“Idiitema yotagatibige niaanjo lapo loiigi Goniotagodi ane idei manitaga nigotaga Laodicéia: Lotaga Nigijoa ane liboonagadi ‘Jigidaagee’, leegodi ewi me ikee anodaageeteda Aneotedogoji codaa me jakataga me jinakatonaga ane ligegi. Jiginiaaginiwa Aneotedogoji ane ibake meote inoatawece aninoa. ¹⁵Jowoogodi gadoenatakatiwaji. Gadiciagitiwaji nigina ninyogodi ane degewi me dapicogo otegexaagaga diwete, odaa agica aneletema. Domaga jemaa me gadiciagitiwaji anigepidigica nigijoa itoa latopaco ninyogodi, mige diwete, ogoa, domige ijo ane dapicogo. ¹⁶Pida leegodi me gadiciagitiwaji nigina ninyogodi anokexaa dapicagawaanigi, odaa agakaamitiwaji ane diwete otegexaagaga dapicogo, odaa icota me inokotagadicitiwaji. ¹⁷Leegodi menitibecetiwaji, ‘Oko liicotedi, inoa inoatawece ane jopoogatibige, agica ane aniaditibige mokotaga.’ Pida agowoogotitiwaji makaami oko awikotaagipi, madewetedi, goladi, codaa mokakaamitiniwacetiwaji. ¹⁸Enice gadajointiwaji manoojeteeta inioolo anoiwilegi minitaga noledi amanagawini ewi makaamitiwaji liicotedi. Codaa anoojeteeta jayogoli lapacogogoli amaleegaga adinixomitiwaji, odaa agaleegokakaamitiniwacetiwaji oditaga aniboliki. Codaa anoojeteeta inipomaada lajo gagecoogeli amaleegaga ewi matenitibece.

¹⁹Nigina ane jemaa, japetege codaa me jiloikatidi. Enice adinoniciwagati maniwitici, codaa adinilaanitibecetiwaji. ²⁰Digawini! Ite Ee epoagi, jiniditagawa. Nigica ane najipatiwa, odaa yomoke

lapoagi, jakatiwece
ligeladi, odaa ja igiwa.

²¹Nigidi anoigeke
ane beyagi, jinode me
inicoogowepodi manitaga
inibaanco anejote me
jiigenataka, digo aneji me
jigeke ane beyagi, odaa ja
idicote miniwataga Eiodi
manitaga nibaanco aneite
me diigenataka.

²²Ane yemaa me
wajipa, dice ajipaata
ane ligegitiogi Liwigo
Aneotedogoji lapoli loiigi
Goniotagodi!”

**Odigaanagatibigimece
Aneotedogoji digoida
ditibigimedi**

4 ¹Naga nigotedini notaga
lapoli loiigi Goniotagodi,
naga jiwiticogi ida, odaa jinadi
ijo epoagi domoke digoida
ditibigimedi. Odaa nigijo
oko ane dotaga ane liciagi

layaagegegi goloneeta, baanaga ijo me idotaganege, meetiwa, “Anagi meetaga digoina ditibigimedi! Odaa jikeetagawa anicotece anigida noko.” ²⁻³Odaa agica daga leegi Liwigo Aneotedogoji ja dakatiwigiji. Odaa jinadi nibaanco nigina oko ane gonegegi digoida ditibigimedi. Odaa nigini ane nicoteloco nagani baanco, latopiwa micoataga niginoa wetiadi ane diniwaloe, macataga “diamante” me igeditice, acaagaca “sardônio” ane ixagodi igeditice. Liniogotibece nagani baanco adi oxaago ane datale macataga aca “esmeralda” ane dione igeditice.

⁴Liniogotibece nagani baanco idiwa eletidi ²⁴baancotedi, nibaanco niginoa gonegaga. Onicoteloco ²⁴lacilodi odinixotinigilo lapacogogoli, codaa lacilodi idiwa laleli oolo. ⁵Nalebepagatedi icogotiwece manitaga nagani baanco gonege, layaagegegi ica ane notaganaga codaa me layaagegegi niximagaga. Odaa lodoe nagani baanco idiwa seete noledagaxiidi ane ídi, anidiaagidiwa nigidiwa seete niwicidi anodibatema Aneotedogoji. ⁶Lodoe nagani baanco gonege jinadi idi ane liciagi weiigi ane digica liniogo igeditice macataga nagana galaapa.

Liniogotibece codaa odipegege nagani baanco gonege icoa cwaatolo ewikaga, anowidi ligecoogeli lodoe codaa me lowidi. ⁷Nigini odoejege ewikegi liciagi ica



(Apocalipse 3.20)

liaon, ica eledi ewikegi baga latopiwa alolanaga, ica eledi ewikegi latobi baga liciagi latobi goneleegiwa, ica owidijegi ewikegi liciagi ica nitaanigo ane wayo.

⁸Onintecibeci nigidiwa cwaatolo ewikaga idiwa seis labadi. Odaa nigidiwa labadi noleetelogo ligecoogeli. Noko codaa menoale anotokotiniwace, modi,

“Goniotagodi Aneotedogoji ida eliodi loniciwaga,
codaa agica ane beyagi miniwataga.
Akaaginiwa,
codaa icota menagi.”

⁹⁻¹⁰Nigijoa cwaatolo ewikaga nigina me nigaanaganaga, moiwenigide, codaa modiniotagodelalo Niginiwa ane nicoteloco nagajo epaa nibaanco me gonegegi, nigini anidioka limedi me yewiga, odaa nigijoa 24 lacilodi ja dakagitiniwace lodoe Niginiwa ane nicoteloco nibaanco me gonegegi, modi,

¹¹“Goniotagodi Aneotedogoji leeditibige me gadiwenigidenegegi
codaa jogeegatagawa,
codaa jikanagatagadici gadiigenatakanegegi.
Igaataga oeni inoatawece aninoa.
Oeni inoatawece,
odaa idioka limedi minoa leegodi jigidaa anemaani.”

Lotaganagaxi Nigijoa anoiciaceeketege waxacoco

5 ¹Jinadi notaganagaxi liciagi nigina nilipatigi idei libaagadi Nigijoa ane nicoteloco nibaanco me gonegegi. Nagadi notaganagaxi dinidi idoatawece liwailidi, oyexocagaditeloco seete lapadijetedi ane noxoco. ²Odaa ja jinadi ijo aanjo loniciwengenigi ane dinigetagatee me digika, mee, “Amiijo anida nagatetigi me noga lapadijetedi nagadi notaganagaxi me yomoke?” ³Pida agica ganigetigijo digoida ditibigimedi, otegeaagaga digoina iigo, migetaga catinedi iigo ane yakadi me yomoke oditaga iwi ane diniditeloco nagadi notaganagaxi. ⁴Eliodi me jinoetibece leegodi me digica anida nagatetigi me yomoke oditaga yalomegeteloco aniwoteloco nagadi notaganagaxi. ⁵Odaa ijo onijoteci nigidiwa 24 lacilodi meetiwa, “Jinaganoeni! Digawini! Nigijoa anoyatedigi me ‘Liaon’ anida aneetege licogegi loiigi Judá, ane litaagi Davi inionigi-eliodi gonegegi, ja igeke loniciwaga némaga, odaa baga yakadi me yaagadi nigidiwa seete lapadijetedi ane noxoco nagadi notaganagaxi, odaa ja yomoke.”

⁶Odaa ja jinadi Nigijoa anoiciaceeketege waxacoco dabiditedi lodoe nibaanco nigijoa ane gonegegi, oyawiile nigidiwa cwaatolo ewikaga, ijaagijoa 24 lacilodi. Nigijoa Waxacoco latopiwatibige nigijo moyeloadi. Idiwa seete libiwedi, ligecoogeli idaa liwokodi seete, anoikee nigicoa seete liwicidi Aneotedogoji ane niwakateetedeloco inatawece iigo.

⁷Nigijoa anoiciaceeketege Waxacoco jigigo dibate nagajo notaganagaxi ane idei libaagadi Nigijoa ane nicoteloco nibaanco me gonegegi.

⁸Naga dibate nagajo notaganagaxi, nigijoa cwaatolo ewikaga, ijaagijoa 24 lacilodi dakagitiniwace lodoe nigijoa Waxacoco. Onintecibeci

nigidiwa lacilodi ada nofoxiga-liwenaga, codaa idoa nibaxiatedawaanaga oolo, nolee edokojegi, ane ikee lipoketedi noiigi ane nepilidi Aneotedogoji nigina moyotaganega. ⁹Oigaa gela elaagi, modi,

“Dagaxa mida ganagatetigi,
joanigidaa makati mabaata nagadi notaganagaxi,
odaa aagati nigidiwa seete lapadijetedi leegodi metigadeloati,
codaa leegodi gadawodi me anado,
ane loojedi manoojeteetema Aneotedogoji oko,
inoatawece ane noiika,
inoatawece ane iolatedi nigina iigo,
codaa anoicogoticogi inoatawece iigotedi,
codaa minoatawece ane latopaco oko.

¹⁰Odaa jagawii mokiditece noiigi,
odaa jigiigeni laalegenali,
codaa majicitigi nagatetigi modibatema Aneotedogoji,
odaa jogoiige inatawece iigo.”

¹¹Naga inoletacibige, odaa ja jajipata lapo nelegi aanjotedi. Oyawiile nibaanco gonege, idiaagidiwa cwaatolo ewikaga, ijaagijoa 24 lacilodi. Dagaxa meliodi, ajakataga me inilaagatagatiogi. ¹²Odaa dinigetagateetibigiwaji modi,

“Nigidoa Waxacoco anoyelodi dagaxa me gonegegi,
odaa leeditibige me dibatetege nagatetigi,
niliicagajetecidi,
lowoogotakanegegi,
codaa me loniciwaga.
Codaa leeditibige me jiwenigidenaga,
jocaganagatalo,
codaa me jogeegatalo niginiwa anoiciaceeketege Waxacoco.”

¹³Odaa ja jajipatiogi iditawece ane newiga digoida ditibigimedi, digoina iigo, codaa aneite émagaga, codaa aneitinigi akiidi-eliodi. Iditawece modi,

“Niginiwa ane nicoteloce nibaanco me gonegegi,
idaagidoa anoiciaceeketege Waxacoco,
leeditibige midioka limedi me jogeegatiogi,
jiwenigidenaga, jocaganagatiogi,
codaa me jikanagatece ane nagatetigi.”

¹⁴Odaa nigijoa cwaatolo ewikaga jogoigidi, modi, “Ewi! Jigidaagee (Amém)!” Odaa nigijoa 24 lacilodi ja dakagitiniwace, jogoiwenigide nigidi anidioka limedi me newiga.

Lapadijetedi ane noxoco nagajo notaganagaxi

6 ¹Odaa ja jinadi nigijoa Waxacoco me yaagadi nigijoo odoejegi nigijoo seete lapadijetedi anonoxoco nagajo notaganagaxi. Odaa ja jajipata onijoteci nigijoo cwaatolo ewikaga dapaawe me dotaga micataga nigina niximagaga,

mee, “Diganagawini!” ²Naga inoletibige, odaa ja jinadi ini apolicaganaga lapacegegi. Nigijjo apolicaganagemigi ida lopitenigi. Odaa jogoyajigota lale me anigaanyegegi. Odaa ja noditice, igo me didele, odaa ja dinigaanye.

³Nigidiaagidi nigijjoa Waxacoco ja yaagadi nigijjo eledi lapadijegi nigijjoa seete anonoxoco nagajo notaganagaxi. Odaa ja jajipata ijo eledi nigijjoa cwaatolo ewikaga mee me dotaga, “Diganagawini!” ⁴Odaa ja noditice apolicaganaga lixagotegegi. Odaa jogoyajigota nigijjo apolicaganagemigi loniciwaga meo nigina oko me dagadiaa ilagatiwage, pida diniwitidegetiwage, dinigodi. Codaa dibatege lodaajo-ocagataga.

⁵Odaa nigijjoa Waxacoco jigicota me itiwatadigidi yaagadi nigijjoa seete lapadijetedi ane noxoco nagajo notaganagaxi. Odaa ja jajipata me dotaga nigijjo eledi nigijjoa cwaatolo ewikaga, mee, “Diganagawini!” Naga jiwiticogi, odaa ja jinadi apolicaganaga nabidegegi. Nigijjo apolicaganagemigi ilokadita nibikotanaganagate (nagana lajo moibikota liwaagatiigi ganigidi). ⁶Odaa ja jajipata ica ane dotaga liwigotigi nigidiwa cwaatolo ewikaga, meeta, “Itoatadigida goopa leyeema licawa loojedi mabaa onidateci noko, codaa noove goopatedi ‘cevaada’ aagaga licawa loojedi mabaa onidateci noko. Pida jinaga itinegeni najidi, codaa viinyo adagaga abeyacagati!”

⁷Nigidiaagidi nigijjoa Waxacoco ja yaagadi ijo eledi nigijjoa seete lapadijetedi ane noxoco nagajo notaganagaxi. Odaa ja jajipata nigijjo owidijegi nigijjoa cwaatolo ewikaga mee me dotaga, “Diganagawini!” ⁸Naga inoletibige, odaa ja jinadi apolicaganaga baayo. Nigijjo apolicaganagemigi liboonagadi “Némaga”, ijaagijjo ijo lokaagedi diotibeci lowidi liboonagadi “Aneiticoace émagaga, noledi ane daga ipe”. Odaa jogodibatege loniciwaga monigodi oko, oniniteci nigicoa cwaatolo liwailidi nigina iigo. Odaa jogonigodi oko, oyatita me nidelaga, nigigi, neelotika, codaa me niginoa eijedi anetigodeligo.

⁹Odaa nigijjoa Waxacoco ja yaagadi nigijjo eledi lapadijegi ane noxoco nagajo notaganagaxi. Odaa ja jiwitiwece le nagajo nameeja “bronze”, odaa ja jinadi liwicidi nigijjoa baanaga nigo leegodi moyelogoditedibece Aneotedogoji lotaga, codaa midioka limedi modiatece liigaxinaganegegi Jesus. ¹⁰Nigidiwa niwicidi napaawagateloco, modi, “Akaami Goniotagodi ane iigeni inoatawece, agica makaamitaga gaantokaagini ane beyagi, akaami anewi. Igaatigi ica nigawini anemiita idi oko digoida iigo? Igaatigi nigaloikatiti nigijjo anetigodigodi?” ¹¹Ijoatawece nigijjoa liwicidi nigijjo baanogonigodi jogodibatege nijayogoli ocagatedi, lapacogogoli. Odaa moditiogi, “Anipenawaanigitiniwace nigepaagicota me nigo nigidi eledi, baanaga iolatedicoace Aneotedogoji monigodi, nigidi gadokaagetedipi mabaatema Goniotagodi, codaa me ganioxoadipi.”

¹²Odaa ja jinadi nigijjoa Waxacoco nagaga yaagadi nigijjo naga seis lapadijegi ane noxoco nagajo notaganagaxi. Odaa digawini! Ijo natalalaga nigina ane yoniciwadi, yatalale inatawece iigo. Aligege ja nabidi macataga nagana lipegetege ane nabidi ane dinixotinigi ane dininya, codaa epenai jagaga ixagodi micoataga niginoa godawodi. ¹³Yotetitedi enitedinigi iigo, micoataga niginoa niale-ela

baanaga beyagi ane niwadetedini nigina me igike niocodi. ¹⁴Ditibigimedi agaleegica jinataga, ja ma, ja liciagi nagana notaganagaxi lamodi anoilipadi. Codaa inoatawece ane wetiadi nelecoli, codaa me niginoa lidelocotedi digike, oyetecetice ane limedi. ¹⁵Odaa niginoa inionaga-eloodoli digoina iigo, inoa lacilodi iodagawadi, inoa liicotedi, inoa anida nimawenegegi loniciwengenaga, inoa niotaka, inoa ane daga niotaka, iditawece domaga dinagaditiniwace catiwedi niginoa lawimagajetedi-wetiadi liwigotigi wetiga eloodo minoataga niginoa wetiadi nelecoli. ¹⁶Odaa jogodapaawetiogi niginoa wetiadi ane leegitibigimece niginoa wetiadi eloodoli, modi, “Aniitogoloco amaleegaga godagategigitema Aneotedogoji ane nicotedeloco nibaanco miniwa me gonegegi, codaa niginiwa Waxacoco ane yelatedogodomi. ¹⁷Igaataga jigicota noko metigodiloikatidi leegotedi gobeyacegeco, codaa agica ane yakadi me iwoko nigida noko.”

Icoa 144 miili oko loiigi Israel

7 ¹Nigidiaagidi naga inoletibige, odaa ja jinadi cwaatolo aanjotedi dabiditiniwace onidatecibeci idiwa cwaatolo liniocidi iigo. Onolitedini nigicoa cwaatolo latopaco niocodi digoina iigo owotibige me digicata niocodi ane yawe nigina iigo, otegexaagaga akiidi-eliodi, otegexaagaga nialeli. ²Odaa ja jinadi eledi aanjo ditibigimece ane icogoticogi aligege menodi. Ada libikotananagagate lajo meo nibikotaxete nigijo oko ane nepilidi Aneotedogoji ewikegi. Naga dapaawetiogi nigijoa cwaatolo aanjotedi anodibatege loniciwaga miniwataga Aneotedogoji mowo lawikodigi oko digoina iigo, codaa me miditaga akiidi-eliodi. ³Odaa mee nigijo aanjo, “Jinagawii ane beyagitema nigina iigo, idiaa akiidi-eliodi, otegexaagaga niginoa nialeli, nigepaa jigodi me inibikota latocolodi nigina liotagipi Aneotedogoji.” ⁴Odaa ja jajipata ane liwokodi oko anadi nibikotaxete Aneotedogoji latocolodi. Ijo 144 miili oko, anida aneetege loiigi Israel.

⁵⁻⁸ Ijoa 12 miili oko ida aneetege licogegi loiigi Judá,
 Ijoa 12 miili oko ida aneetege licogegi loiigi Rúben,
 Ijoa 12 miili oko ida aneetege licogegi loiigi Gade,
 Ijoa 12 miili oko ida aneetege licogegi loiigi Aser,
 Ijoa 12 miili oko ida aneetege licogegi loiigi Naftali,
 Ijoa 12 miili oko ida aneetege licogegi loiigi Manassés,
 Ijoa 12 miili oko ida aneetege licogegi loiigi Simeão,
 Ijoa 12 miili oko ida aneetege licogegi loiigi Levi,
 Ijoa 12 miili oko ida aneetege licogegi loiigi Issacar,
 Ijoa 12 miili oko ida aneetege licogegi loiigi Zebulom,
 Ijoa 12 miili oko ida aneetege licogegi loiigi José,
 Ijoa 12 miili oko ida aneetege licogegi loiigi Benjamim.

Lapo noiigi-nelegi

⁹Naga ixomagatice me jinaditioigi loiigi Israel, odaa digawini! Ja jinadi noiigi-nelegi, dagaxa meliodi agica ane yakadi me nilagaditibigiwaji. Oicogoticogi minoataga inoatawece ane noiika, inoatawece ane iolatedi, inoatawece ane iigotedi, codaa inoatawece ane latopaco oko. Iditawece nigidi noiigi dabiditiniwace lodoe baanco ane nicote Aneotedogoji, codaa me lodoe Waxacoco. Iditawece odinixotinigilo nijayogoli ocagatedi, lapacogogoli. Oilokaditalo laamotiidi “palmeira”. (Oikee moiwenigide Aneotedogoji). ¹⁰Odaa napaawagateloco, modi,

“Goniotagodi Aneotedogoji ane nicotedeloco epaa nibaanco,
 iniaa Waxacoco,
 joanigidiaa owo godewiga.”

¹¹Idiwatawece aanjotedi idi me dabiditiniwace oyawiile ane nicote Aneotedogoji, ijaagijoa 24 lacilodi, ijaagijoa cwaatolo ewikaga. Odaa idiwatawece aanjotedi dakagitiniwace lodoe nibaanco Aneotedogoji. Dakagitiniwace negepaa icotinigi latobi iigo. Odaa iditawece odogetetalo Aneotedogoji. ¹²Iditawece modi,

“Jigidaagee.
 Jiwenigidenaga codaa jogeegatalo Goniotagodi Aneotedogoji.
 Iniotagodeegatalo,
 codaa me jiwenigidenaga leegodi minoa lixaketedi,
 yowoogodi inoatawece,
 codaa minoa nimawenegeco,
 eliodi loniciwaga.
 Idioka limedi me daga diniigiteda.
 Odaa jigidaagee.
 (Amém).”

¹³Onijoteci nigijoa lacilodi naga idige, meetiwa, “Amiidiwa idiwa lapacogogomaga? Igame oicogoticogi?”

¹⁴Naga jigidi, mejita, “Ajowoogodi. Akaami bogowoogoti, iniotagodi.” Odaa jegeetiwa, “Nigidi oko nigijo aneliodi me nawikodeega leegodi Liboonagadi Goniotagodi. Oiwilegi lowoodi, oyatitalo lawodi Waxacoco, odaa ja yapacaga. ¹⁵Odaa joanigidaa leegodi midi lodoe nibaanco Aneotedogoji. Odaa noko codaa menoale idi me nibaaga mini ligeladi Aneotedogoji. Aneotedogoji ane nicotedeloco nibaanco doweditedeloco nigidi oko igaataga iniwa miditaga. ¹⁶Odaa agaleegica daga nigodi nigigi, otegexaagaga ecibi, otegexaagaga aligege, migetaga nilaga yakadi me yalegitibigiwaji. ¹⁷Igaataga niginiwa Waxacoco ane itedeloco liwigotigi nibaanco Aneotedogoji jegepaageote anoyeligo, codaa micataga nowienogodi Waxacoco ilaajotedibece, yadeegitedinece ninyokotiidi anowo godewiga. Odaa Aneotedogoji iwilegitema inoatawece latiidi ligecoogeli.”

Owidijegi lapadijegi ane noxoco nagajo notaganagaxi

8 ¹Odaa nigijoa Waxacoco naga yaagadi nigijo owidijegi lapadijegi ane noxoco nagajo notaganagaxi, odaa ja daxixe digoida ditibigimedi, ejime meya-oorá me daxixe. ²Odaa ja jinadi ijoo seete aanjotedi ane dabiditiniwace lodoe Aneotedogoji. Odaa jogodibatege ijoo seete goloneetatedi.

³Odaa nigijo eledi aanjo jegenagi, odaa ja dabiditi ipegitege ajo nameeja oolo nolitini ijo baxiawaanigi oolo lajo moyetigi edokojegi. Eliodi edokojegi oyajigota me ipeketeloco nameeja oolo, liboonigitalo Aneotedogoji. Nigida edokojegi ikee nigijoa lotaga nigina noiigi ane nebi Aneotedogoji nigina moyotaganegetedibece.

⁴Odaa naga yabidi nigijo edokojegi, odaa logocilagadi jogopitedibigimece miniwataga Aneotedogoji icogotedicogi midataga nigijo baxiawaanigi ane nolitini nigijo aanjo, liciagi lotaga nigina noiigi anida aneetege Aneotedogoji me icotibigimece miniwataga Aneotedogoji nigina moyotaganegetedibece.

⁵Odaa nigijo aanjo naga dibata nigijo baxiawaanigi, odaa ja yetigi noledi ane ideí ditibigimedi nameeja. Odaa ja nokoletinicogi digoina iigo. Odaa jegeo me dayaagetigí oko, codaa eliodi niximagaga, nalebepakatedi, codaa me datalale iigo.

Icoa goloneetatedi

⁶Nigidiaagidi nigijoa seete aanjotedi anodibatege nigijoa seete goloneetatedi ja dinilakidetiniwace moyatetigilo nigoloneetatedi.

⁷Igaanaga datenaga nigijo odoejegi aanjo, odaa ja jinadi noledi, inaa galatili-eloodoli awatege godawodi, onokoletedinicogi digoina iigo. Odaa ja yabidi oniniteci nigidiwa iniwatadigini liwailidi nigina iigo, yabidi nialeli, codaa me inatawece nipodigi ane dione.

⁸Naga yatetigi nigijo eledi aanjo nigoloneeta, ini ijo ane liciagi nagana wetiga ane leegitibigimece ane yabidi, analee oyokoletinigi akiidi-eliodi, odaa oniniteci nigidiwa iniwatadigini liwailidi nigidi ninyogodi ja godawodi. ⁹Odaa ja nigo oniniteci liwai, nigidiwa iniwatadigini liwailidi niginoá ane itinigi akiidi-eliodi, codaa oniniteci liwai nigidiwa iniwatadigini liwailidi nigicoa etogoli ja daa.

¹⁰Odaa nigijo eledi aanjo naga yatetigi nigoloneeta, odaa nagajo yotedi nelegi ane ídi macataga nagana noledagaxi jegeniteloco oniniteci liwai nigidiwa iniwatadigini liwailidi akiititedi codaa me niginoá eletidi ninyokotiidi. ¹¹Nagajo yotedi liboonagadi “Nibayodaga”. Odaa oniniteci liwai nigidiwa iniwatadigini liwailidi ninyokotiidi ja bayodi. Joanigidáa leegodi eliodi oko nigo leegodi mowacipeta nigidiwa ninyokotiidi ane bayodi.

¹²Odaa nigijo eledi aanjo ja yatetigi nigoloneeta. Odaa jegeo anigota oniniteci liwai nigidiwa iniwatadigini liwailidi aligege, epenai, codaa me yotetitedi. Odaa ja nexocaga oniniteci liwai niginiwa iniwatadigini liwailidi aligege, epenai, codaa me yotetitedi, Odaa ja nexocaga oniniteci liwai nigidiwa itoatadigida lagaagetedi noko codaa menoale.

¹³Nigidiaagidi naga inoletacibige, odaa ja jinadi ijo nitaanigo ane wayotibece digoida ditibigimedi, dapaawe me dotaga, mee, “Nagoodi iditawece oko ane nigeladimigipitigi digoida iigo leegodi niginoa baanigicotalo me ninyaco, nigicota nigijoa eletidi itoatadigida aanjotedi nigaaga oyatetigilo nigoloneetatedi.”

9 ¹Naga ixomagatijo me jinadi nigijjo nitaanigo me wayotibece, odaa ja jinadi ijo eledi aanjo me yatetigi nigoloneeta. Odaa ja jinaditege ijo ane dinikatinigi iigo icogotibigimece ditibigimedi macataga nagana yotedi ane wakagi. Odaa ja dibatege lakabakenaganagadi lajo me yomoke elagigi ane digicata liniogo. ²Naga yomoke nigijjo elagigi, odaa ja noditedice owidi gocolagadi. Odaa aligege codaa minatawece ditibigimedi ja nexocaga leegodi nigijjo gocolagadi ane noditedicogi nigijjo elagigi. ³Ijoa gonipititidi awatege nigijjo gocolagadi me noditedice, odaa jogodinikatinigi iigo. Odaa jogodibatege niweneeno micataga nelá niweneeno. ⁴Odaa jogoyolitema dogowo anodigota ane beyagi nawodigijedi, nialeli, codaa mokanicodaagica enanigijegi. Pida inokina nigina oko ane dagacata nibikotaxete Aneotedogoji latocolo, bogoikatece monojogotiniwace. ⁵Nigidiwa gonipititidi oyolitema dogonigodi oko, pida bogoikatece mowo me nawikodeega ciinco epenaitedi. Odaa oilee nojocagatedi micataga nigina me godojogo nelá. ⁶Odaa nigidiwa ciinco epenaitedi nigina oko domogodoletibige me nigo, pida agaleegica némaga. Domogoyemaa daga nigo, pida agalee nigo.

⁷Nigijjoa gonipititidi liciaco micoataga niginoa apolicaganadi baanaga igotelogo me witidi. Minitaga lacilo ani lale liciagi nagana nale oolo. Inoa latopidi бага latopiwa oko latobi. ⁸Inoa laamotiidi ocagatedi liciagi iwaalo lamodi, lowe liciaco nigediogo lowe. ⁹Elipogo liciagi nagana oecagaxi gapilecege yapogoditini natecogodi. Labadi layaagagawa niginoa nagaagenali anowidi apolicaganadi anoixigi baanaga waleditiobece me witidi. ¹⁰Inoa liweka liciagi liwegi nelá. Midataga liwegi ada nibite diniweneene aneo me dawikode oko ciinco epenaitedi. ¹¹Nigini ninionigi ane iigetibigiwaji, nigijjo aanjo ane dowediteloco nigijjo elagigi ane digicata liniogo. Nigijjo aanjo me diboonagatedetigi “hebraico” liboonagadi “Abadom”, eledi diboonagatedetigi “grego” liboonagadi “Apolião”, amina anejinagata “Nigini godaagadi.”

¹²Nigijjo odoejege nelegi nawikodigi ja ixomagatijo. Pida egenagiteda eletidi itoataale nelecoli nawikodico.

¹³Odaa nigijjo eledi aanjo naga yatetigi nigoloneeta, odaa ja jajipata ica ane dotaga, ipegitege nigidiwa cwaatolo liwailidi nameeja oolo, ane idei lodoe Aneotedogoji. ¹⁴Odaa ja yotaganene nigijjo aanjo anada nigoloneeta, meeta, “Ikanitedice nigidiwa cwaatolo aanjotedi ane dinigoetiniwace digoida miditaga akiidi-nelegi Eufates.” ¹⁵Odaa ja dinikatedice nigijjoa cwaatolo aanjotedi baanaga nigomaga nagajo lakata, ijaagijjo noko, ijaagijjo nigijjo domiingo, codaa ijaagijjo nicaagabi. Ja nigomaga monigodi oniniteci liwai nigidiwa iniwatadigini liwailidi inatawece oko. ¹⁶Odaa ja jajipata ane liwokodi apolicaganagademaga ane witidi, one iniwata taalia miliaon. ¹⁷Igaanaga jinadi nigida yakatigi ane icaa

ina daga igeedi, jinadi ijoa apolicaganagademaga. Inoa noecagaxiidi gapilecege ane yapogoditini natecogotedi, ixagodi micataga noledi, codaa imakatagadi macataga aca wetiga ane diniwaloe, anodita “safira”, igowi micataga galewaga ane ikatice aligopenaganenege. Lacilodi nigijoa apolicaganadi liciagi liaon lacilo. Noditedicogi niolatedi noledi, inaa gocilagadi ane lanicagawa aligopenaganenege logocilagadi lanigi. ¹⁸Nigidiwa anowo ane beyagi: Noledi, gocilagadi, inaa getledi gocilagadi ane lanicagawa aligopenaganenege logocilagadi lanigi, ane noditedicogi niolatedi nigidiwa apolicaganadi, odae jogoyaagadi onijoteci liwai nigidiwa iniwatadigini liwailidi oko inatawece iigo. ¹⁹Odatika ica notoetiigi nigidiwa apolicaganadi ane icogotiwece niolatedi, codaa inoa limiko liweka liciagi lakeedi lacilo. Odae jigidaa odatika liwegi monanacilotiditi nigidi noiigi.

²⁰Pida nigijo oko ane iwoko me nigo idioka limedi agoika mowo ane beyagi. Agoika modagatalo niwicidi abeyacagaga, niginoa niwicidi anonoetedi odatikata oolo, beexo, “bronze”, wetiga, codaa me iwogo. Nigidiwa niwicidi anodagatalo ayatetibigiwaji, anajipaaga otegeaagaga ewaligiteda. ²¹Codaa nigidi oko agalee dinilaatibigiwaji moyeloadi eledi oko, otegeaagaga oikateda niginoa loxikonegeco, codaa agoika lakatigi me noomatewa niginoa ane daga lodawadipi, otegeaagaga me nolicaga eledi agoika.

Ica aanjo acaagaca notaganagaxiawaana

10 ¹Odae ja jinadi eledi aanjo loniciwegenigi, icogotibigimece ditibigimedi. Lowoodi ane dinanatece liciagi lolaadi, liniogotibece lacilo adi oxaago. Latobi datale macataga aligege, laxaceli idi micataga nigina galewaga ane leegitibigimece me idi. ²Nolitini ajo notaganagaxiawaana ixake. Odae ipodegeteloco logonagi ditibigimedi akiidi-eliodi, idaa nimagijegi ipodegeteloco iigo. ³Odae ja dapaawe layaagagawa nigina nigediogo me dokologoloke. Naga dapaawe, odae jegeote seete naxacogonakatedi (micataga daga oninigodi nigijjo aanjo me dotaga). ⁴Nigijjo naga jajipata nigijjo seete niximagakatedi, odae ja domaga jiditedi ijoa lotaga. Pida ja jajipatalo ijo nigege icogotibigimece ditibigimedi aneetiwa me idotaganenege, “Otetenitedagadomi makamokakaami mowoogoti ane ligegi nigijjo seete niximagakatedi. Jinaga domaga idiitedi!”

⁵Nigidiaagidi nigijjo aanjo ane jinadi me dabiditini ninyogodi codaa me ditibigimedi iigo, nawacetibigimece libaagadi ditibigimedi. ⁶Odae jegeo ligegi ibake Liboonagadi Aneotedogoji, anidioka limedi me yewiga, ane yoe ditibigimedi, iigo, codaa me akiidi-eliodi, codaa inoatawece niginoa aninoa. Odae mee nigijjo aanjo, “Agalee leegi odae Aneotedogoji ja yaagadi nigina iigo. ⁷Igaanige yatetigi nigoloneeta nigijjo owidijegi nigijjo seete aanjotedi, odae Aneotedogoji jegeote nigijjo ane lowoogo ane digicata ane yowoogodi, nigijjo ane yelogoditediogi nigijjo liotaka anoyelogoditedibece Aneotedogoji lowooko.”

⁸Nigijjo nayaagegegi ane jajipata ane icogotibigimece ditibigimedi ja jajipataca, meetiwa, “Emii, abaata nagada notaganagaxiawaana ane ixake me nolitini nigida aanjo, nigida aanjo ane ipoditeloco akiidi-eliodi, idiaa iigo.”

⁹Odaa jegejigo midataga nigijo aanjo, odaa ja jipokota nagajo notaganagaxiawaana. Odaa jegeetiwa, “Abaatege nagada notaganagaxiawaana, odaagelici! Yalegitigi gawokomaga, pida бага ilidagaditigi ganioladi micataga napigo.”

¹⁰Odaa ja jibatege nagajo notaganagaxiawaana, odaa ja jeligo. Ildagaditigi inioladi micataga napigo. Pida nigidiaagidi naga jalitini, odaa ja yalegitigi iwokomaga. ¹¹Odaa jegeetiwa nigijo aanjo, “Leeditacibige matemati ane ligegi Aneotedogoji me ligegitediogi nigina ane noiika, inoatawece ane latopaco oko, inatawece oko anodotagatigi eletidi iolatedi, codaa me niginoa inionaga-eloodoli.”

Icoa itoataale oko anoyatemati ica Aneotedogoji ane ligegitediogi inatawece okotigi nigina iigo

11 ¹Odaa joganajigotowa ijo iwoogo micataga nigina meetilo. Odaa nigijo aanjo naga dabititi odaa jegeetiwa, “Adabititi, abikotani ane lica Aneotedogoji ligeladi, codaa me nagadi nameeja oolo, codaa anilagati nigidi anodogetetalo Aneotedogoji catiwedi ligeladi. ²Pida jinagabikotani wetice miditaga niogó Aneotedogoji ligeladi, igaataga bogoyajigotiogi nigina noiigi ane digicata aneetege Aneotedogoji. Odaa nigidi noiigi owote 42 epenaitedi moipoditeloco nagani nigotaga Aneotedogoji ane iomagaditedice me nebi. ³Jimonya nigijoa itoataale iotaka anoyelogodi Aneotedogoji ligegitediogi nigidi noiigitigi nigina iigo. Odirixotinigilo jaacogoli moiikee me agecagalodipi. Odaa igotibeci owote onaniteci miili, nigigo 260 nokododi moyelogoditedibece lowooko Aneotedogoji.”

⁴Odaa ijoa jinadi itoataale nialeli “oliveira” ijaagijoa itoataale noledagaxiidi ane dabititiniwace lodoe Goniotagodi Aneotedogoji ane yoe nigina iigo, nigidiwa jigijaaagijoa nigijoa itoataale liotaka Aneotedogoji. ⁵Digicatibece aneo ane beyagitema, odaa noditicogi noledi niolatedi moyaaagadi niginoa lidelagawadi. Odaa jigidaagee me nigo nigina ane domegeo ane beyagitema nigijoa itoataale. ⁶Nigidiwa liotaka Aneotedogoji ida nimawenegegi monoxoco ditibigimedi, owote me daga datiode nigicoatigilo nokododi moyelogoditedibece lowooko Aneotedogoji. Codaa eledi ida nimawenegegi mowote niginoa ninyokotiidi me dinanatigi me godawodi. Codaa ida nimawenegegi moniige lawikodico nigina oko digoina iigo, nigina moyemaa mowote.

⁷Igaanige oigodi nigijoa itoataale liotaka Aneotedogoji moyelogoditedibece lowooko Aneotedogoji, odaa nigijoa eijeeagagi nelegi ane doide ja noditibige icogotinece nigijoa elagigi ane digica liniogo. Odaa ja idelege nigijoa itoataale liotaka Aneotedogoji, odaa agodibotege, ja nigodi. ⁸Igaanige nigo, odaa loolatedi jigidiaagitedice mijotaga niladigodi nagani nigotaga eloodo, nigijoa anoyelite Goniotagodi moyototedeloco nicenaganagate. Nagani nigotaga owo me nikoxeedi me “Sodoma”, “Egito”. (Leegodi nigicoa loenataka ane beyagi nigidi nigeladimigipitigi nagani nigotaga). ⁹Odaa inoatawece ane iigotedi, inoatawece ane noiika, inoatawece ane iolatedi, codaa minoatawece ane latopaco

oko, oiwiteloce nigidiwa liotaka Aneotedogoji ane nigo, odaa agoika digica ane naligitiniwace. ¹⁰Odaa iditawece nigidi noigitigi nigina iigo ninitibigiwaji leegodi naga nigo nigidiwa liotaka Aneotedogoji. Codaa odinediatigi nogetedi leegodi me ninitibigiwaji. Leegodi nigidiwa liotaka Aneotedogoji oditece niginoa notaga ane dogoyemaateda mowajipatalo, notaga anowo nigidi noiigi me nawikodeega.

¹¹Pida naga ixomagatedijo itoatadigida nokododi nigigo meeya, odaa nigijo Niwigo aneo me godewiga icogoticogi miniwataga Aneotedogoji, ja dakatiogi, odaa ja dabiditaciniwace nigijoa itoataale. Odaa ijotawece nigijo oko anonadi eliodi me doitibigiwaji. ¹²Odaa nigijoa itoataale liotaka Aneotedogoji jogowajipata ligegi ica ane dapaawe icogotibigimece ditibigimedi, meetiogi, “Anagitiwaji digoina ditibigimedi!” Egidaa diitigi nigijoa lidelagawadi moiwi, nigijoa itoataale liotaka Aneotedogoji jogopitibigimece ditibigimedi oyadeegitibigimoace oditibigimece lolaadi. ¹³Odaa agica daga leegi ja datalale iigo. Odaa onijoteci liwai nigidiwa deez liwailidi nigotaga ja daa. Odaa ja nigo seete miili oko. Odaa nigijo eledi oko ane daga nigo eliodi me doitibigiwaji, odaa jogodogetetibigimece Aneotedogoji ane ideite ditibigimedi, modi me loniciwengenigi.

¹⁴Odaa jigidaagee naga ixomagatijo nigijo eledi nelegi nawikodigi. Pida egina eledi nawikodigi anicota menagi.

Owidije goloneeta

¹⁵Odaa nigijo owidijegi aanjo ja yatetigi nagajo nigoloneeta. Odaa digoida ditibigimedi jigijo ane notaganaga napaawagateloco, modi,

“Natigide anida loniciwaga me iige inoatawece ane noiika,
Goniotagodi Aneotedogoji iniaa Cristo,
Nigijoa ane imonya meote lewiga oko.

Odaa natigide idiokaanaga limedi me niigenatakanaga.”

¹⁶Odaa nigijoa 24 lacilodi, ane niigenatakanaga, anonicotelogo epaa nibaancotedi lodoe Aneotedogoji, dakagitiniwace negepaagicotinigi latopidi iigo, modogetetalo Aneotedogoji. ¹⁷Odaa modi,

“Goniotagodi Aneotedogoji aneliodi ganimawenegegi,
ane iigeni inoatawece,
anakaami ewikegi,
anakaagakaami,
codaa anicota managi,
iniotagodeegatagawa
leegodi mabakeni ganimawenegegi nelegi,
codaa jogowicenagani me iigeni inatawece oko.

¹⁸Niginoa ane noiika eliodi moyelatagadomi,
pida jigicota noko maloikatiti,
codaa mawini anodaagemiitigi émagaga.
Jigicota galakatagi mawii nogeedi nigijoa gaotaka
anoyelogoditedibece gadowooko,

codaa minatawece noiigi ane ganepilidi,
 nigijo anodeemitetibigagaji.
 Inatawece ane gadoiigi odibatege nogeedi,
 nigina oko ane gonegaga,
 inaaginoa iwikodadi ane daga gonegaga.
 Jigicota noko me aagati niginoa anoyaagadi iigo.”

¹⁹Odaa ja domoke Aneotedogoji ligeladi digoida ditibigimedi, odaa ja jakadi me jinadi nagajo niwokodagaxi ligeladi Aneotedogoji. Nagajo iwokodagaxi eo me nalagatibigogoji naga dinilakidetacetege Aneotedogoji nigina oko. Odaa jigijoa nalebepakatedi, napaawakatedi, eliodi niximagaga, codaa datalale iigo, ijaagijoa galatili nelecoli anenitidi.

Aca iwaalo icaagica Gowidi

12 ¹Odaa ja nodi digoida ditibigimedi ijo yakatigi nigina ane jopooga, ane digicata me jinataga liciagi. Jinadi iwaalo ane dinixotinigilo nowoodi liciagi aligege. Epenai idei natinedi logonaka, ipoditeloco. Lacilo ani lale anidiwa dooze yotetidedi. ²Nagani iwaalo ipilege, codaa me dacaagetibece, ja ilee le.

³Odaa ja jinadi ijo eledi ane nodi digoida ditibigimedi, inaagina nigina ane joxicagatema. Jinadi ijo Gowidi nelegi lixagotegegi. Idiwa seete lacilodi, idiaa deez libiwedi. Odaa nigidiwa lacilodi inoa laleli (anoikee me diigenataka). ⁴Datikata liwegi nelegi me yanikati onijoteci liwai nigijoa iniwatadigini liwailidi yotetidedi, odaa ja nokoletedinigi iigo. Odaa jigidiaa dabidi lodoe nagajo iwaalo baanaga nipegi me dinigaje. Odaa jigidiaagi ja domaga nibeotege me yakaloi nigica nigaanigawaanigi degenitini. ⁵Nigidiaagidi nagajo iwaalo ja dinigaje, goneleegiwa lionigi ane iige inoatawece ane noiika, codaa datiteteloco me iige. Pida nigijo nigaanigawaanigi jogonogaticce, oyadeegi mipegitege Aneotedogoji, manitaga aca nibaanco gonege. ⁶Odaa nagajo iwaalo jegeloditicogi miditaga ijo nipodigi ane digicata nigeladimigipi, nipodigi Aneotedogoji ane ilakidetetema nagani iwaalo, odaa jigidiaagi me doweditedeloco onaniteci miili nigigo 260 nokododi.

⁷Odaa jigijo nidelaga digoida ditibigimedi. Miguel ijaagijoa niaanjotedi oidelege nigijo Gowidi. Odaa ja didele nigijo Gowidi laxawepodi nigijoa aagaga niaanjotedi. ⁸Pida nigijo Gowidi ane doide aniadi me didele. Odaa nigijo Gowidi ane doide ijaagijoa niaanjotedi agaleegoyakadi midiaagite digoida ditibigimedi. ⁹Odaa nigijo Gowidi nelegi jogoniticoitice me ideite ditibigimedi, ijaagijoa niaanjotedi. Odaa jogonokoletinigi digoina iigo. Nigini Gowidi one nigijo lakeedi oxigodi ane ninaaletiniwace inatawece oko. Ane liboonagadi diaabo, Satanás (amina anejinagata “Godaxakawa”).

¹⁰Odaa ja jajipata ijo ane dapaawe me dotaga digoida ditibigimedi, mee me dotaga,

“Nigina natigide Aneotedogoji nogatedice nigina oko me iteloco
 loniciwaga godaxakawa,
 ikee loniciwaga,

odaa ja iige inatawece oko.

Codaa Cristo Nigijoa ane niige Aneotedogoji meote lewiḡa oko, ikee loniciwaga.

Leegodi nigijo ane beyagi me dotagatibige gonioxoadipi noko codaa menoale lodoe Aneotedogoji, ijaagijo jogonokoletini me idei ditibigimedi.

- 11 Gonioxoadipi jogoigeke nigijo Gowidi odatika loniciwaga lawodi Waxacoco (nigijoa ane yeletedogodomi), codaaeledi odatika notaga aneetece Jesus. Nigidi gonioxoadipi ja nigomaga codaa me nigo leegodi Jesus.

- 12 Enice aniniitibecetiwaji ane ideoni digoida ditibigimedi, leegodi agaleegica nigijo Gowidi makaamitagatiwaji! Pida бага dakaketagadomitiwaji anakaami nigeladimigipitigi digoina iigo, codaa niginoa aninoa catinedi akiidi-eliodi. Igaataga diaabo ja dinikatini makaamitagatiwaji, codaa eliodi me deligide, leegodi yowoogodi mokateciḡidiwa nokododi me dinikatice.”

13 Igaanaga nadi nigijo Gowidi ane doide noḡonokoletinigi digoina iigo, odaa jigidaa diiticogi me iatetibeci nagajo iwaalo ane dinigajetece nigaanigawaanigi.

14 Pida jogoyajigota nagajo iwaalo itoataale labadi nitaanigo nelegi owotibige me yakadi me wayoticogi miditaga aneitice, nipodigi ane digicata nigeladimigipi, aneite modowediteloco nigepaa ixomagatedijo itoatadigida nicaagape nigigo meeya. Odaa nigijo Gowidi ane doide, lakeedi-nelegi agaleegaca me nadi nagajo iwaalo. 15 Odaa nigijo lakeedi-nelegi jegeo me noditicogi nioladi ninyogodi liciagi nigina aboogo-ninyogodi walokoditece lowidi nagajo iwaalo domegeotibige daga yakadi me yadeegi ninyogodi. 16 Pida iigo yaxawa nagajo iwaalo, ilibitece nigijo ninyogodi micataga digida nioladi milibitece. 17 Odaa nigijo lakeedi-nelegi, eliodi me yelatema nagajo iwaalo, odaa jigigo idelegetiogi nigijo anida aneetege licogegi, nigijo anoyotete liigenatakanegeco Aneotedogoji, codaa anidioka limedi moyiwagadi nigijoa Jesus lotaga anewi.

Icoa iniwataale eijedi ane doide

13 1 Idiaagejote liniogotibece akiidi-eliodi. Odaa ja jinadi ijo eijeegagi ane doide, icogotinece ninyogodi. Ijoa deez libiwedi, idiaa seete lacilodi. Inoa laleli midoataga libiwedi. Idiwatawece lacilodi inoa nidiko ane beyagi modotagatibige Aneotedogoji. 2 Odaa nigini eijeegagi ane beyagi liciagi nigediego. Pida logonaka бага liciaco logonaka “urso”. Nioladi liciagi nioladi liaon. Odaa nigijo oxiiḡodi lakeedi ja yajigota nigini eijeegagi loniciwaga, yajigota nibaanco me diigenataka, codaa me nagatetigi aneliodi. 3 Oniniteci lacilo nigini eijeegagi micataga daantaga yeleo, pida eyewiḡa. Odaa inatawece oko odoxicetema, odaa

jogodiotibeci nigijo eijeegagi ane doide. ⁴Odaa inatawece oko jogodogeteta nigijo oxiigodi lakeedi igaataga jejepaa yajigota nagatetigi nigijo eijeegagi ane doide. Codaa eledi odogeteta nigijo eijeegagi, modi, “Amiijo ica ane liciagi ini eijeegagi? Domigica anida nimawenegegi meo ane beyagitema?”

⁵Jogoika nigini eijeegagi me dotagatibece dinanetibece, codaa eote lotagatibige Aneotedogoji niginoa ane beyagi, codaa ida nimawenegegi me diigenataka 42 epenaitedi. ⁶Odaa jigidaa dinanatigi me beyagi me dotagatibige Aneotedogoji, codaa me Liboonagadi, codaa me beyagi me dotagatibige aneite Aneotedogoji, ica anidi digoida ditibigimedi eletidi beyagi me dotagatibige. ⁷Odaa nigijo eijeegagi ane doide jogoikatece me idelege Aneotedogoji loiigi, codaa me igeke. Dibatege loniciwaga me iige inoatawece ane latopaco oko, inoatawece ane noiika, codaa minoatawece ane isolatedi. ⁸Inatawece oko digoina iigo odogeteta nigini eijeegagi ane doide. Idioka dogodogeteta nigidi oko ane idiwa liboonagatedi me diniditedini maditaga lotaganagaxi Waxacoco, nigijoa Waxacoco anijo moyeloadi. Aneotedogoji eote nigida lowoogo me iditedeloco nagadi notaganagaxi liboonagatedi nigidi oko aneote me newigatace. Akaagida me lowoogotetece anigicatibige daga yoe nigina iigo.

⁹Ane yemaa me wajipa, ele me watacotece niginoa ane wajipatalo. ¹⁰Nigina ane niwilo eledi oko, icota magaga oniwilo. Nigina ane daije ane datikata nodaajo-ocagataga, icota minaagoyatita nodaajo-ocagataga moyeloadi. Odaa leeditibige loiigi Aneotedogoji modinatitalo niginoa ane lawikodico, codaa midioka limedi modiotetece, codaa me degeyamagaticoace eliwagatakanegegi.

¹¹Odaa ja jinadi eledi eijeegagi ane doide icogotinece catinedi iigo. Idoa itoataale libiwedi liciaco micoataga niginoa waxacoco libiwedi. Pida layaagagawa nigina Gowidi me daale, diximogo. ¹²Nigijo eijeegagi ja ikee meliodi loniciwaga lodoe nigijo odoejegi eijeegagi ane doide, codaa liciagi me yoniciwadi nigini odoejegi. Odaa ja iige inatawece oko digoina iigo modogeteta nigini odoejegi eijeegagi ane ijo elaciledi ane domaga yeloadi, pida ja ici. ¹³Nigini eledi eijeegagi eo loenatagi nigina ane joxicagatema, eo menitinigi nigina iigo noledi icogotibigimece ditibigimedi, eotibige monadi inatawece oko. ¹⁴Odaa ja ninaaletiniwace inatawece ane noiigi nigina iigo leegodi nigijo anoikatece meo lodoe nigijo odoejegi eijeegagi. Odaa ja iige inatawece ane noiigi mowo liwilanigi liciagi nigijo odoejegi eijeegagi anoyacilotidita nodaajo-ocagataga, pida ja ici. ¹⁵Iniaagini nigini eijeegagi ja dibatege loniciwaga meo me daale nigijo liwilanigi ane liciagi nigijo odoejegi eijeegagi, jegeo nigijo niwilanigi me yakadi me dotaga, codaa me diigenatakatiogi monigodi nigina oko ane dogodogeteta. ¹⁶Nigijo eijeegagi ja iige inatawece oko moyexocagaditeloco libaagadi mige latocolo nibikotaxete nigini odoejegi eijeegagi, agica ligiamegedi inatawece oko, ina iwikodadipi, inoa gonegaga, inoa liicotedi, inoa madewetedi, ina niotagipi, inaagina ane daga niotagipi. ¹⁷Agica ane yakadi me dinoojete otegexaagaga gaantigidi elaanigi, nige dagacata nibikotaxete, mige liboonagadi, ogoa, migetaga ane liwokodi liboonagadi nigijo eijeegagi ane doide.

¹⁸Nigina oko leeditibige mida lixakedi me yowoogodi ane diitigi. Nigina anele lacilo бага yakadi me iwelatibige ane liwokodi liboonagadi nigijo eijeegagi, leegodi ane liwokodi, liwokodagawa codaa ikee ane liboonagadi goneleegiwa. Odaa ane liwokodi liboonagadi 666.

Ica elaagi nigidi oko ane dinoojetetediogi Aneotedogoji me nepilidi

14 ¹Naga jiwitacogigi, odaa ja jinadi nigijoa Waxacoco dabiditedi ditibigimedi aca niwetiga Sião. Miniwataga idiwa 144 miili goneleegiwadi ane diniditeloce latocolodi liboonagadi Aneotedogoji ane Eniodi. ²Odaa jajipata ica ane dotaga digoida ditibigimedi, layaagagawa nigina laxogokegegi ninyogodi ane igedi, codaa layaagagawa micataga nigina niximagaga, codaa liciagi nigina oko eliodi anoyatetigilo nogoxiga-liwenadi. ³Nigijoa 144 miili okoli idei lodoe nagajo baanco gonege, codaa me lodoe nigijoa cwaatolo ewikaga, ijaagijoa 24 lacilodi. Odaa nigidiwa 144 miili okoli nigaaganaga, oigaa gela elaagi anidiokidi me yakadi moyowoogodi, nigidi ane dinoojetetediogi Aneotedogoji ane nogatedicogigi liwigotigi oko digoina iigo meote me nepilidi. ⁴Nigidi jigidiaagidi nigica oko ane dinoweditibigiwaji me yapiditibigiwaji, anigica daga noomatewa iwaalo. Codaa odioteci naigi anigotece nigijoa Waxacoco. Jigidiaagidi odoejedi ane iolatedicoace Aneotedogoji me nepilidi, codaa me niginiwa Waxacoco magaga nepilidi. ⁵Agica daga niwitakaga, odaa agica lapioyagajegi me idei lodoe nibaanco gonege, Aneotedogoji.

Icoa itoatadigida aanjotedi

⁶Nigidiaagidi ja jinadi eledi aanjo ane leegitibigimece me wayo, yadeegi nibodigi aneetece ane ligegi Aneotedogoji meote gobiniigi ane yemaa meote, nigida nibodigi adiniigi. Igo me yelogoditiogi nigeladimigipitigi iigo, inatawece ane noiigi, inoatawece ane noiika, inoatawece ane latopaco oko, codaa me inoatawece ane iolatedi. ⁷Mee me dinigetagatee, “Eemiteetibige Aneotedogoji, codaa ogeetetalo leegodi jiginiaaginiwa ane dagaxa me gonegegi! Leegodi jigicota lakata Aneotedogoji me iwi anigotediogi oko codaa me iloikatidi. Ogeetetaliwaji Niginiwa ane yoe ditibigimedi, iigo, akiidi-eliodi, codaa me niginoa ninyokotiidi-libecoli.”

⁸Ijo eledi aanjo dioteci nigijo odoejegi, odaa mee, “Ja daa, ja diopati nigotaga nelegi, anoyatigi me Babilônia. Yajigotiogi niviiyo inatawece noiigi, codaa iedegetinece mowacipe. Nigida viiyo one nigicoa lidagatakanegeco ane beyagi, me ilidagadi me loomatewa okanicodaagica oko.”

⁹⁻¹⁰Ijo eledi aanjo jagaga dioteci nigijo eledi, odaa mee me dinigetagatee, “Nigijo oko ane dogeteta nigini eijeegagi ane doide codaa me liwigo niwilanigi, codaa ane dinibikotatece nibikotaxete libaagadi, domige latocolo, бага wacipeta niviiyo Aneotedogoji. Nigica niviiyo Aneotedogoji one nigica lélagá. Micataga oko me yadotinigi goopa viiyo odaa agica ane yalegeteetege, joanigidaagee Aneotedogoji yelatetema nigina oko, odaa ayawanagaditetege

lélaga liwikodenatakanegegi. Iticoitedicogi migotibeci nawikodeega minitaga noledi, inaa gocolagadi ane lanicagawa aligopenaganene logocolagadi lanigi. Nigidi oko nawikodeega lodoe aanjotedi anodibatema Aneotedogoji, codaa me lodoe Waxacoco me iticoitedicoace. ¹¹Nigidiwa gocolagadi aneo me nawikodeega idioka limedi me yoniciwadi me noditedice, odaa nigidi oko agica daga nipenaga noko codaa menoale. Pida idioka limedi me nawikodeega, nigidi anodogeteta eijeegagi ane diojo codaa me liwigo niwilanigi, codaa anadi me yadeegitibeci nibikotaxete liboonagadi nigijo eijeegagi.

¹²Leeditibige nigidi noiigi ane iomagaditedice Aneotedogoji me nepilidi modithege ane dakaketema codaa moyotete liigenatakanegeco Aneotedogoji, codaa moyiwagadi lotaga Jesus, amanagawini agica aneyamagatice.”

¹³Odaa ja jajipata ica anee me dotaga digoida ditibigimedi, “Idiitedini yotaga: Icota me ninitibigiwaji nigina ane nigo nigina natigide leegodi modiotece Goniotagodi.” Odaa Aneotedogoji Liwigo ja niwoditema nigijo ane dotaga, meeta, “Ewi! Nigidi oko ja nipenagatema libaketedi, codaa aganiaditema nagajegi leegodi libakedi.”

Oiolaticoace oko digoina iigo

¹⁴Naga inoletacibige, odaa ja jinadi ijo lolaadi ane yapacaga. Odaa nigini ane nicoteloco nigini lolaadi liciagi nigijoa Goneleegiwa ane icogotedibigimece ditibigimedi. Ani lale oolo lacilo, codaa nolitini nodaajo ane dalepe, lajo me dakacitaka. ¹⁵Odaa ijo eledi aanjo icogotiwece ligeladi Aneotedogoji, odaa ja dinigetagatee me dapaaweta nigijo ane nicoteloco lolaadi, meeta, “Akacitakanita gadodaajo maladienagani, leegodi jigicota lakata me jiladienaganaga. Leegodi nigina iigo jigicota me diniodateloce.” ¹⁶Odaa nigijo ane nicoteloco lolaadi ja dakacitakata nodaajo digoina iigo, odaa ja nioda okotigi nigina iigo, micataga nigina monopilagaditedio nawodigijedi.

¹⁷Odaa ijo eledi aanjo eledi icogotiwece ligeladi Aneotedogoji digoida ditibigimedi, aagaga ida lodaajo ane dalepe.

¹⁸Nigidiaagidi ica eledi aanjo ane nowienogodi noledi, noditicogi maditaga Aneotedogoji nameeja bronze. Odaa ja dinigetagatee me dapaaweta nigijo aanjo anida nodaajo ane dalepe, odaa meeta, “Akacitakanita gadodaajo odaa anakagiti ligecidi ‘uuva’ digoina iigo. Leegodi jegei nigidiwa ‘uuva’.” ¹⁹Odaa nigijo aanjo ja dakacitakata lodaajo digoina iigo, odaa ja nakagidi “uuva” ligecidi, odaa ja yokoletinigi aca iwokodagaxi nelegi, anoyelite monipodi uuvatedi, anei Aneotedogoji me ikee meliodi lélagatetema oko leegotedi libeyacegeco. ²⁰Odaa jogonipoditedini “uuva” maditaga nagajo iwokodagaxi wetice nigotaga. Odaa owidi godawodi icogotiwece nagadi iwokodagaxi, iwidadibigimece apolicaganaga le, codaa me daligilice iwida icoa meya-taalía leegoa.

Aanjotedi anonadeegi icoa seete nawikodico

15 ¹Nigidiaagidi ja jinadi digoida ditibigimedi nigina ane jopooga codaa ane yakadi me godawelagadi. Jinadi ijoo seete aanjotedi anonadeegi ijoo seete nawikodico. Pida jogowidijedi leegodi jogoigoditece icoatawece nawikodico ane niwakateetedigi Aneotedogoji nigina oko digoina iigo. Yelatetema leegodi libeyacegeco.

²Odaa ja jinadi nigijoo ane liciagi weiigi pida galaapa ane igeditice mawatege noledi. Eledi jinadi nigijoo oko anodinigaanyetece moidelege nigijoo odoejegi eijeegagi ijaagijoo liwigo anoiwila. Nigidi oko agodinibikotata nibikotaxete, otegexaagaga nigijoo nilakataka ane liwokodi liboonagadi nigijoo eijeegagi. Nigidi oko dabiditiniwace miditaga nigijoo ane liciagi weiigi pida galaapa ane igeditice. Inoa nogoxiga-liwenadi Aneotedogoji ane yajigotediogi. ³Nigaanaganaga, oigaa ijo elaagi Moisés nigijoo liotagi Aneotedogoji ijaagijoo elaagi Waxacoco. Modi me nigaanaganaga,

“Goniotagodi Aneotedogoji,
eliodi gadoniciwaga.

Codaa eloodoli niginoa gadoenataka ane joxicagatema.

Jagakamagakaami ninionigi-eliodi noiigi ane aolaatice me gadoiigi.
Igenaga codaa ewi niginoa gadowooko.

⁴Goniotagodi Aneotedogoji,

agica ini ane daga deemitetibagagaji.

Codaa agica ini ane daga dogetetagawa,

leegodi akamokakaamita me digicata gabatiigi
codaa makaami ane yapidi.

Inoatawece ane noiika enagitibeci makaamitaga,
odogetetagawa digoina gadodoe.

Igaataga inatawece jogonadi niginoa gadoenataka me igenaga.”

⁵Odaa nigidiaagidi ja jinadi me domoke Aneotedogoji ligeladi digoida ditibigimedi, jinadiwece catiwedi le, anetedice Aneotedogoji. ⁶Odaa nigijoo seete aanjotedi anonadeegi nigijoo nawikodico ja noditicoaci oicogotiwece ligeladi Aneotedogoji. Odinixotinigilo nowoodi nigitikonagadi ane yapacaga, codaa datale, codaa ijoo nigoenagatedi oolo ane yakaogotigi natecogotedi. ⁷Odaa onijoteci nigijoo cwaatolo ganigijoo mejedi ewikaga ja yajigotiigi nigijoo seete aanjotedi onidatecibige baxiawaanigi oolo, ane nolee ganigida ica laxegi, ane ikee Aneotedogoji me yelatetema libeyacegeco nigina oko. Aneotedogoji nigijoo anidioka limedi me yewiga. ⁸Odaa ligeladi Aneotedogoji ja nolee gocilagadi ane ikee loniciwaga Aneotedogoji, codaa me latalaga. Odaa agaleegica ane yakadi me dakatiwece Aneotedogoji ligeladi negepaa ixomagatediijo ijoatawece nigijoo seete nawikodico anonadeegi nigijoo seete aanjotedi.

Icoa baxiatedawaanaga anoikee Aneotedogoji me
yelatetema oko leegotedi libeyacegeco

16 ¹Nigidiaagidi ja jajipata ica ane dapaawe me dotaga icogotiwece layaagegegi catiwedi Aneotedogoji ligeladi digoida ditibigimedi, meetiogi nigijoa seete aanjotedi, “Emiitiwaji adootinigi iigo nigidoa laxedi nigidoa seete baxiatedawaanaga, ane ikee Aneotedogoji me yelatetema libeyacegeco nigina oko.”

²Odaa nigijoo odoejege aanjo ja yadotice nigijoo nibaxiawaanigi nadotinigi digoina iigo. Odaa ja nodi liwexegadi nelecoli anoilee nigidi oko anadi nibikotaxete nigijoo eijeegagi ane doide, codaa modogeteta nigijoo niwigo anepaa liwilanigi nigidi oko.

³Odaa ijo eledi aanjo ja yadotice nigijoo aagaga nibaxiawaanigi nadotinigi akiidi-eliodi. Odaa nigina ninyogodi ja liciagi godawodi micoataga lawilota émegegi, odaa ja nigo inoatawece eijedi ane newigatinigi akiidi-eliodi.

⁴Odaa ijo eledi aanjo jagaga yadotice nibaxiawaanigi yadotinigilo inoatawece akiititidi, inoa ninyokotiidi libecoli, odaa inoatawece ane ninyokotiidi ja liciagi godawodi. ⁵Odaa ja jajipata ijo aanjo ane doweditelogo ninyokotiidi, mee,

“Goniotagodi Aneotedogoji,

akaami ane igenaga,

codaa gadewiki,

codaa akaagakaami,

codaa icota managi,

leegodi mida nigida aneni,

odaa joanigidaa leegodi nagaloikatiti nigidi oko.

⁶Igaataga nigidi oko onadoogodi lawodi noiigi anaolaatice me gadoiigi, codaa me lawodi nigijoo anoyelogoditedibece gadowooko.

Odaa jagajicitiogi godawodi mowacipetaloo.

Odaa natigide jogodibatege ane loojedi nigijoo loenatagi ane beyagi.”

⁷Odaa ja jajipata ijo nigege ane icogotiwece maditaga Aneotedogoji nameeja bronze, mee me dotaga,

“Ewi nigidaageni Goniotagodi Aneotedogoji eliodi gadoniciwaga.

Codaa nigina maloikatiti oko,

awii nigina anewi codaa me igenaga.”

⁸Odaa ijo eledi aanjo jagaga yadotice nibaxiawaanigi, yadoteloco aligege. Odaa aligege jigida loniciwaga me yalegi inatawece oko micataga noledi. ⁹Odaa nigica nelegi lapicagaga ja nalegitiniwace nigina oko, odaa ja beyagi modotagatibigimece Aneotedogoji anida nimawenegegitetece niginoa nawikodico. Pida idokee dogodinilaatece libeyacegeco, codaa agodogetetalo Aneotedogoji aneliodi loniciwaga.

¹⁰Odaa ijo eledi aanjo ja yadotice nigijoo aagaga nibaxiawaanigi, yadoteloco ajo nibaanco ane nicote nigijoo eijeegagi ane doide. Odaa icatawece nigica ane ninioxadi ane iige, ja nexocaga. Odaa nigidi oko jogoyowagi loxexodi leegodi anoilee. ¹¹Nigidi oko beyagi modotagatibigimece Aneotedogoji ane

ideite ditibigimedi leegodi niginoa anoilee, inaaginoa liwexegadi. Pida idokee agodinilaatece loenataka ane beyagi.

¹²Ijo eledi aanjo ja yadotice nigijo aagaga nibaxiawaanigi, yadotinigi akiidi-nelegi ane liboonagadi Eufates. Odaa ja ipe, jegeo me naigi nigijoa nionaga-eloodoli anoicogoticogi nigoi. ¹³Odaa ja jinadi ijoo itoatadigida niwicidi anowote niginoa loenataka ane napioi. Nigidiwa niwicidi liciagi nabiotedi-nelecoli noditedicogi nioladi nigijo lakeedi-oxiigodi “Gowidi”, ijaagijo odoejegi eijeegagi ane doide, ijaagijo awitakegi anee minaagina ane yelogoditedibece Aneotedogoji lowooko. ¹⁴Nigidiwa nabiotedi-nelecoli, niwicidi abeyacagaga anowote loenataka anetigodawelagadi. Nigidiwa iniwatadigini niwicidi igotibeci minoataga niginoa nionaga-eloodoli inatawece iigo onodetiogi me nidelaga nigicota nigica noko Aneotedogoji aneliodi nimawenegegi nige ikee meliodi loniciwaga.

¹⁵Odaa jegee Jesus, “Digawini! Janagi micataga nigina olicegegi anogonibeotigi, odaa ja janagi. Eliodi linikegi nigina oko ane dinowedi codaa me doweditelogo lowoodi, me dogokidatani, odaa aniboligatibigiwaji lodoe eledi oko.”

¹⁶Nigidiaagidi nigijoa iniwatadigini niwicidi jogoyatecogotee inionaga-eloodoli miditaga nipodigi ane liboonagaditigi ica ioladi hebraico “Armagedom”.

¹⁷Odaa ijo owidijegi aanjo yadoticobece nibaxiawaanigi yokoletibece nigijo laxegi. Odaa jigijo ijo ane dapaawe me dotaga diigetecogi manitaga nagajo baanco gonege ane idei catiwedi Aneotedogoji ligeladi, mee nigica ane dotaga, “Agaleegica ananiaditibige, ja igo.” ¹⁸Odaa jegeote nalebepakatedi, naxacogonakatedi, eliodi niximagaga, codaa inoa nigicoa layaagegeco, codaa me datalale iigo. Agica liciagi nigica natalalaga nigijo maleekokina nigina oko digoina iigo. Dagaxa me doide, agica liciagi. ¹⁹Nagajo nigotaga eloodo iniwatadigini liwailidi me dawalace, codaa inoatawece nigotadi digawiniteloco iigo eletidi daa. Odaa Aneotedogoji ja nalagatigilo nagajo nelegi Babilônia, naga yajigote nagajo nigotaga nigijo baxiawaanigi ane nolee viinyo ane ikee lawikodigi ane niwakatee leegodi meliodi me yelatetema, leegodi libeyacegeco nigidi nigeladimigipi. ²⁰Codaa inoatawece lidelocotedi ja jabalagatigilo, inoa wetiadi nelecoli eletidi ma. ²¹Codaa galatili eniteloco oko icogotedibigimece ditibigimedi, licawadi wetiadi nelecoli ane iwida 40 ciilo liwaagatiigi. Odaa nigina oko ja beyagi modotagatibige Aneotedogoji leegodi niginoa lawikodico aneote nigijoa galatili eloodoli, leegodi eliodi nigica lawikodigi.

Aca iwaalo agopeloa ane digicaadaga yowoogodi

17 ¹Odaa onijoteci nigijoa seete aanjotedi anijo nibaxiawaanigi negenagi meetaga, odaa jegeetiwa, “Anagi, jikeetagawa anodaageeta nigoiloikatidi nagajo iwaalo agopeloa, ane digicaadaga yowoogodi. Nagani iwaalo eote me nalagatibigogoji nagajo nigotaga eloodo anipegitege owidi akiititidi. ²Niginoa inionaga-eloodoli ja noomatewa nagani iwaalo, codaa minoatawece ane noiika nigina iigo nemága mowacipeta niviinyo naga loomatewepodi.”

³Odaa ja dakatiwigiji Liwigo Aneotedogoji, odaa ijo aanjo ja yadeegi iwigo miditaga nipodigi ane yadiloteloco ane digica nigeladimigipi. Jigidiaagi naga jinadi ajo iwaalo ane waxoditeloco nigijo eijeegagi ane doide, lixagotegegi. Inatawece lolaadi nigini eijeegagi dinidi, diniditelogo niginoa notaga ane beyagi modotagatibige Aneotedogoji. Nigini eijeegagi idiwa seete lacilodi, codaa idiwa deez libiwedi. ⁴Nagajo iwaalo dinixotinigi lipegetege ane ixagodi, me nolidigo lawogo. Anitawece nolee icoa nadinagajetecidi oolo, wetiadi ane diniwaloe, acaagaca “pérola”. Ilokadita ijo baxiawaanigi oolo ane nolee, nigida laxegi eo me nalagatibigogoji ijoatawece nigijoa loenataka ane napioi nigina me loomatewepodi goneleegiwadi. ⁵Latocolo diniditeloco boonagadi, anida ane diitigi, ane dinagaditi, pida agica ane yowoogodi. Ica boonagadi one,

“Babilônia ane digicaadaga yowoogodi me eliodo inatawece
iwaalepodi agopeloaga,

inaagina nigina anowo okanicodaagica ane napioi digoina iigo.”

⁶Odaa ja jinadi nagajo iwaalo yemága, yemakatidi me wacipetalo lawodi loiigi Aneotedogoji, codaa me lawodi nigijo ane nigo leegodi modiotibece Jesus.

Nigijo naga jinadi, eliodi me idawela. ⁷Odaa ja idige nigijo aanjo, meetiwa, “Igaamee ina manawela? Natigide ja jelogoditagawa anodaa diitigi nigida ane digicata ane yowoogodi, aneetece nagajo iwaalo, ijaagijo nicoogoladi eijeegagi ane doide, anijoa seete lacilodi, idiaa deez libiwedi. ⁸Nigijo eijeegagi ane doide ananati jigijo me yewiga, pida nigina natigide agalee yewiga. Odaa icota me noditice icogotinece libegi ane digica liniogo, odaa jigigo minitaga noledi ane daga ipe. Maditaga lotaganagaxi Aneotedogoji idiwa liboonagatedi nigica oko anidiokaanaga limedi me newiga. Anigicatibige Aneotedogoji daga yoe nigina iigo nigidiwa liboonagatedi me diniditedini. Odaa nigijo nigeladimigipitigi nigina iigo ane digica liboonagadi maditaga nagadi notaganagaxi nawelatibigiwaji nigoiwita nigijo eijeegagi ane doide. Nigijo eijeegagi baanaga ijo me yewiga, nigina natigide agalee yewiga. Pida icotace me dinikee.

⁹Leeditibige mele godacilo me jowoogotagatece anodaa diitigilo niginoa notaga ane jiditedi. Nigidiwa seete lacilodi nigijo eijeegagi — one nigicoa seete lojotagatedi-nelecoli aneitece me nicote nagajo iwaalo. ¹⁰Eledi one diitigi — me icoa seete inionaga-eloodoli. Odaa cinco jegenitiniwace, ja nigo. Pida oniniteci nigidiwa seete eginu me diigenataka, icaagicaeledi anigica me jinataga. Icota magaga diigenataka, pida agowidi nokododi. ¹¹Odaa nigijo eijeegagi ane doide baanigijo me yewiga, pida natigide agaleegica me yewiga, bogoneeledi inionigi-eliodi ane diigenataka nige nigotedice nigijoa seete. Nokaagedi nigijoa seete, codaaeledi igo minitaga noledi ane daga ipe.

¹²Nigijoa deez libiwedi ananati — one nigicoa deez inionaga-eloodoli analee daga niigenatakanaga, pida icota modibatege loniciwaga me niigenatakanaga odinaxawatege nigijo eijeegagi ane doide, aleegi, onexaa onaniteci lakata me niigenatakanaga. ¹³Idiwatawece nigidiwa inionaga-

eloodoli oniwoditema eledi, idokida ane lowoogo. Odaa oyajigota nigijo eijeegagi ane doide loniciwaga, codaa me nagatetigi nigidiwa inionaga.

¹⁴Odaa icota moidelege nigijoa anociaceeketege Waxacoco, pida Waxacoco dinigaanyetetece, igaataga Niotagodi niginoa ane goniotagododi, codaa me Ninionigi-eliodi niginoa inionaga-eloodoli. Laxawepodi nigina aneniditediogi, nigina ane iomagaditedicoace, anidioka limedi modiatece agica degeyamagaticoace.”

¹⁵Odaa nigijo aanjo jegeetiwa, “Nigijo ninyogodi baanigijo manati anei nagajo iwaalo agopeloa me nicoteloco one inatawece ane noiigi, inoatawece ane noiika, inoatawece ane latopaco oko, codaa inoatawece ane iolatedi. ¹⁶Codaa nigijoa deez libiwedi ananati, ijaagijo eijeegagi ane doide oyelatema nagani iwaalo agopeloa. Odaa icota monatetibige icoatawece nigicoa ane nepilidi, codaa oyoladiti anitawece owo mokanitani. Oyeligo liboledi nagani iwaalo, odaa nigica ane yeyagatice, bogoyalegi. ¹⁷Igaataga Aneotedogoji ixotediwece laalegenali eotedibige mowo nigica ane yemaa, codaa eote midokida ane lowoogo. Codaa eote moyemaa moyajigota loniciwaga nigijo eijeegagi ane doide me diigenataka nigepaagicotece lotaga Aneotedogoji.

¹⁸Odaa nagajo iwaalo ananati — jonaganiaagani nagajo nigotaga eloodo ane iige inoatawece inionaga-eloodoli inatawece iigo.”

Anodaagee naga daa aca Babilônia

18 ¹Odaa nigidiaagidi ja jinadi ijo eledi aanjo me dinikatini icogotibigimece ditibigimedi. Eliodi loniciwaga, codaa me datale, naloteloco inatawece iigo. ²Odaa ja dinigetagatee me dapaawe, mee,

“Ja daa, ja diopati gonege Babilônia.

Natigide onanaga ligeladi niwicidi abeyacagaga,
inaaginao niwicidi anowote loenataka ane napioi,
codaa inoatawece ane latopaco ilaagaxodi ane beyagi,
ane godogolotalo.

³Igaataga Babilônia yajigotiogi niviinyo inatawece noiigi,
codaa iedegetinece mowacipeta niviinyo
aneote me nalagatibigogoji nigicoa epaa lidagataka ane beyagi me
loomatewa okanicodaagica oko.

Niginoa inionaga-eloodoli digoina iigo eledi noomatewa.
Pida niginoa anoojetekaga jegepaanaga liicotedi
leegodi nigeladimigipitigi nagani nigotaga odinoojete okanicodaagica
leegodi lidagakanegegi ane beyagi.”

⁴Odaa ja jajipata ica eledi ane dotaga digoida ditibigimedi mee,

“Anotitice nagani nigotaga,

akaami yoiigi!

Anotiticoace!

Adagawanitege niginoa libeyacegeco,

codaa adagawanitege ane lawikodico.

⁵ Igaataga loenataka ane beyagi ja ili,
ja liciagi nigina niladienigi baanaga leegitibigimece,
ane iwidatibigimece negepaa lolaadi.
Pida Aneotedogoji nalagatigilo nigina mowotema ane beyagi nigina oko,
joanigidaa leegodi me ilokatidi.

⁶ Ajicitatiwaji liciagi nigijo ane yajigotagawa!
Oojeteeta, opilagati itoataale lojetedi niginoa loenataka!
Anoleenagati nigoopa lacipagadi ane bayodi,
ane dagaxatace me yoniciwadi,
catedi nigijo ane yoetagadomitiwaji gadacipagadi.

⁷ Ajicitatiwaji lawikodico,
codaa me ligecagalogo ane liwokodi inoa nilicagajetecidi,
inoa nepilidi libinienaga anepaa nimawenagajetedi.
Leegodi mee me dowooko,
'Teyo,
idicotini micataga degeyo iniona-eloodo.
Ageyo wajekalo,
codaa ejidigica dogo-oota meyo agecagalo.'

⁸ Joanigidaa leegodi midokida noko micotalo icoatawece lawikodico,
leelotika,
inoa ane ilee,
codaa me nigigi.
Codaa moyalegi,
oyokoletigi noledi.

Igaataga Goniotagodi Aneotedogoji ane ilokatidi eliodi loniciwaga.

⁹ Nigicoa inionaga-eloodolitigi nigina iigo ane loomatewepodi, ane digicata
ananiaditibige modipegete, joanigidaa napaawagateloco codaa me
noenagateloco nigonadi gocilagadi nige yabidi nagani nigotaga. ¹⁰ Agodipegita,
leegita moyototice leegodi odoita dagawatege nigida analee lawikodigi, oada modi,
'Nagoodo Babilônia,
nagoodo!

Akaami nigotaga eloodo ane yoniciwadi.

Pida catiwedi onaniteci lakata jagakaami ma.'

¹¹ Codaa niginoa anoojetekaga nigina iigo eledi napaawagateloco codaa
me noenaga leegodi Babilônia, leegodi agaleegica ane dinoojetetalo elaanaga.

¹² Agaleegica ane dinoojeteta niolo, nibeexo, inoa niwetiadi ane diniwaloe, aca
'pérola' eledi wetiga ane diniwaloe, acaagaca lipegete ane nipegedi anodita me
nigitikonagadi, codaa acaagaca lipegete ane adi ixagodi codaa me nolidigo
lawogo, codaa me xeeda, otegexaagaga niale ane galagatigi, otegexaagaga
nigica 'marfim', codaa me niale ane dakake lojedi, aca 'bronze', gapilecege,

otegexaagaga ica ‘mármore’, agaleegica ane dinoojete. ¹³Codaa agaleegica ane dinoojete caneela, otegexaagaga nigomaadotedi, icaagica najidi aneletege lanigi nigina moyalegi, otegexaagaga ica ‘mirra’, otegexaagaga nadokojetedi. Agaleegica ane dinoojeteta viinyo, otegexaagaga najidi, otegexaagaga leyeema, otegexaagaga lamogo leyeema, otegexaagaga wacali, otegexaagaga waxacocoli, otegexaagaga apolicaganadi, otegexaagaga nagaagenali, otegexaagaga niginoa niotaka anoyaa.

¹⁴Odaa nigijoa anoonetekaga modita nagani nigotaga, ‘Ijoatawece nigijoa aneledi moleetibige agaleegicoa, ja ma. Codaa jaganiatitema ijoatawece ane ganiliicagajetecidi, codaa mijoatawece ane ganepilidi ane domaga libinienaga. Odaa agaleegica ganimawenegegi makati.’ ¹⁵Nigijoa anoonetekaga ja liicotedi leegodi nigijoo nigeladimigipitigi nagani nigotaga modinoonetetaloo niginoa elaanaga. Nigidiwa anoonetekaga dinogaticoace igotibeci ditigedi, odoitibige dogoyawanagaditege nagani nigotaga moiloikatidi. Odaa napaawagateloco, codaa me nacaagagateloco, modi, ¹⁶‘Nagoodo nagani nigotaga eloodo! Nagoodo!

Nigijoo nigeladimigipi jigijoo modinixotinigilo lipegetege ane nipegedi, lipegetege ane ixagodi, codaa me nolidigo lawogo, codaa odinanatece oolo, wetiadi ane diniwaloe, codaa me “pérola”.

¹⁷Catiwedi onaniteci lakata aniaditema idiwatawece niliicagajetecidi.’


Ijoatawece nigijoa anoiige etogoli, ane wiajeegatinigi ninyogodi, codaa minoatawece niginoa anodibatema etogoli, inaaginao ane eyaagitinibige akiidi-eliodi menaanaganaga, codaa me oojeteega, iditawece nigidi oko agipegitiobece, ideiticoace ditigedi. ¹⁸Igaanogonadi logocilagadi naga yabidi nagajo nigotaga, odaa ja nacaagagateloco modi, ‘Agaca eledi nigotaga liciagi nagani nigotaga eloodo!’ ¹⁹Odaa jogoilojietigi amogo inoa lacilodi (ane lakatigi moikee magecagalodipi), odaa ja napaawagateloco codaa me nacaagagateloco, modi, ‘Nagoodo nagani nigotaga eloodo aneiticoace naga liicotedi ijotawece nigijoo aninoa latogoli, leegodi niginoa elaanaga anoyadeegitedibece. Catiwedi onaniteci lakata nagani nigotaga ja ma.’

²⁰Aniniitibecetiawaji akaamitawece ane gadigeladi digoida ditibigimedi, akaamitiawaji ane gadiomagatitedicoace Aneotedogoji makaami nepilidi, codaa makaami liigexedi, codaa makaamitiawaji anelogotitedibece Aneotedogoji lowooko! Aniniitibece akaamitawecetiawaji igaataga nagajo nigotaga agaleegaca, jogoyaagadi. Aneotedogoji ja iloikatidi leegodi nigijoo loenataka ane beyagitagadomi.”

²¹Odaa ijo aanjo loniciwengenigi ja dibata ajo wetiga nelegi, ane iwaagadi, odaa ja yokoletinigi akiidi-eliodi, odaa agaleegaca me yelogo. Odaa jegee,

“Jigidaagee nigotaga eloodo Babilônia icota monawelagadi beyagi
anodigota monogaticce,
odaa agaleegaca,
codaa agaleegica ane nadi.

²²Odaa nigina oko agaleegoyakadi mowajipatalo nigijoo natenogododi goxiiga-liwenaga manitaga nagani nigotaga,



(Apocalypse 18.18)

inoa enacajoli,
 otegexaagaga anoyatetigi natena codaa me goloneeta.
 Codaa agaleegica dogowajipata layaagegegi moyojogo leyeema
 madataga ewio.

23 Agaleegicoa noledagaxiidi ane nalotigi catiwedi nigotaga,
 codaa agaleegica ane yakadi me wajipatiogi me dinotaganege nigina
 ejoogomigipi.

Nigijoa noojetekenaga dagaxa me gonegatatigi nigina iigo.
 Nigina nigeladimigipitigi nagani nigotaga oninaaletiniwace
 inoatawece ane noiika,
 odatikatalo loxikonegeco.

24 Aneotedogoji iloikatidi nagani nigotaga
 leegodi catiwedi aniaagani nagani nigotaga oyakadi lawodi nigijo
 anoyelogoditedibece Aneotedogoji lowooko,
 codaa me lawodi nigijo noiigi Aneotedogoji
 ane iomagaditedice mepoka nepiliditeda,
 codaa me lawodi ijotawece nigijo anonigodi digoina iigo.”

19 1 Odaa nigidiaagidi ja jajipata ijo ane napaawagateloco me
 notaganaga, layaagagawa nigina anelioditiogi oko ane
 notaganagateloco digoida ditibigimedi modi,

- “Ogeetetalotiwaji codaa mawenigideni Aneotedogoji!
 Jiginiaaginiwa Goniotagodi Aneotedogoji ane najigotedogowa gela
 godewiga.
 Jiginiaaginiwa aneliodi loniciwaga,
 codaa meliodi me datale.
- 2 Nigina me iloikatidi nigina oko ikee nigina anewi
 codaa meote nigina ane igenaga.
 Aneotedogoji iloikatidi nagajo iwaalo agopeloa ane digicaadaga yowoogodi
 leegodi loenataka ane napioi digoida iigo me loomatewepodi oko.
 Aneotedogoji iloikatidi
 leegodi me nigodi nigijoa liotaka Aneotedogoji.”
- 3 Odaa ja napaawagataceloco modi,
 “Ogeetetalo Aneotedogoji
 leegodi niginoa logocilagadi nagajo nigotaga eloodo
 ane yabidi idioka limeridi me itedibige!”
- 4 Odaa nigijoa 24 lacilodi, ijaagijoa cwaatolo ewikaga dakagitiniwace
 odaa jogodogetetalo Aneotedogoji ane nicotedeloco nibaanco gonege, modi,
 “Jigidaagee!
 Ogeetetalo Aneotedogoji!”
- 5 Odaa ja jajipata ica ane dotaga ipegitege nagajo baanco gonege mee me dotaga,
 “Ogeetetalo Goniotagodi Aneotedogoji,
 akaamitawece anakaami liotaka,
 akaamitawece anakaami iwikodadipi,
 codaa anakaami gonegaga,
 akaamitawecetiawaji ane eemiteetibige Aneotedogoji!”

Lalokegi ladonegegi Waxacoco

- 6 Odaa ja jajipata ijo ane dotaga layaagagawa nigina elioditiogi oko ane
 notaganaga, codaa me layaagagawa nigina ninyogodi nelegi ane daxogoke
 codaa magaga layagagawa niginoa naxacogonakatedi. Modi me notaganaga,
 “Ogeetetalo Aneotedogoji,
 igaataga Goniotagodi Aneotedogoji aneliodi loniciwaga,
 ja iige inoatawece.
- 7 Godinitibece,
 idinanenagatibece.
 Odaa jocaganagatalo Aneotedogoji.
 Igaataga jigicota lakata lalokegi ladonegegi Waxacoco,
 codaa nagani liomagata me lodawa jagaga dinenyagaditege.
- 8 Nagani awicije liomagata,
 Aneotedogoji yajigote lipegetege ane nipegedi,
 dalebepe, codaa me yapidi,
 lajo me dinixo.

Nagada lipegetege ida ane diitigi,

one niginoa loenataka ane igenaga nigina oko liomagataka Aneotedogoji.”

⁹Odaa jegeetiwa nigijo aanjo, “Idiitedini niginoa ane yotaga: Ninitibigiwaji nigina oko anonodetibigiwaji migotibeci lalokegi ladonegegi Waxacoco.”

Codaa eledi meetiwa, “Niginoa notaga anejitece, Aneotedogoji lotaga.”

¹⁰Odaa ja idakagitini lodoe nigijo aanjo me domaga jogeteta, pida meetiwa, “Jinogoeetiwa! Igaataga akaami iciagi ee liotagi Aneotedogoji, codaa iciagepodi ganioxoadipi anoyotete niigaxinaganegegi anewi aneetece Jesus. Ogeetetalo Aneotedogoji! Igaataga niigaxinaganegegi aneetece Jesus, latematigo aneo Liwigo Aneotedogoji me notaganaga nigijo anoyelogoditedibece Aneotedogoji lowooko.”

Ijo ane waxoditeloco ica apolicaganaga lapacegegi

¹¹Odaa nigidiaagidi ja jinaditace ditibigimedi me domoke. Odaa ja jinaditace nigijo apolicaganaga lapacegegi ijaagijo ane waxoditeloco liboonagadi, “Niginiwa ane jakataga me jinakatonaga”, eledi liboonagadi “Niginiwa ewi”.

Idioka limedi me igenaga nigina me iloikatidi nigina oko, codaa nigina me idelege nigina ane beyagi. ¹²Ligecoogeli ídi micataga nigina galewaga. Codaa owidi laleli nolee lacilo (ikee meliodi nagatetigi). Idi boonagadi ane diniditologo, agica ane yowoogodi ane diitigi. Epoka yowoogodi ane diitigi nigida boonagadi. ¹³Ajo nicaapa igotigi godawodi. Codaa eledi liboonagadi me “Aneotedogoji Lotaga.”

¹⁴Idiwatawece nigicoa nidelegecajoli digoida ditibigimedi odioetece, owaxoditelogo inoa apolicaganadi lapacagaga, odinixotinigilo lipegetege ane yapacaga, codaa me yapidi. ¹⁵Noditicogi nioladi nodaajo-ocagataga ane dalepe, odaa jigidaa datikata me yaagadi niginoa ane noiika, yoniciwadi me diigenataka. Codaa ipoditedeloco niginoa lidelagawadi iloikatidi micataga nigina oko me nipodi “uuva”, ane niopaagaditedini me noga liwagedi. Odaa jigidaagigotediogi, igaataga Aneotedogoji, aneliodi loniciwaga, eliodi me deligide leegotedi libeyacegeco ina oko. ¹⁶Nicaapa codaa me loxobi diniditeloco,

“Ninioniagi-eliodi niginoa inionaga-eloodoli,
Niotagodi niginoa otagododi.”

¹⁷Odaa ja jinadi ijo aanjo ane dabiditeloco aligege. Odaa ja dapaawetiogi inoatawece ilaagaxodi ane leegitibigimece me wayo, meetiogi, “Anagitiwaji, adinatecogoteeniteloco lalokegi Aneotedogoji me dilokotaje. ¹⁸Anagitiwaji elici libole nigijoa inionaga-eloodoli, ijoa iodagawadi, ijoa lacilodi ane niigenatakanaga, libole ijoa apolicaganadi lajo me niwitidaga, codaa ijoa apolicaganagademaga, codaa me libole inoatawece goneleegiwadi, inoa niotaka, inoa ane daga niotaka, inoa iwikodadi, inaaginoa gonegaga!”

¹⁹Odaa nigidiaagidi ja jinadi nigijo eijeegagi ane doide, ijaagijoa inionaga-eloodolitigi nigina iigo, ijaagijoa niidagawadi, dinatecogotee moidelege nigijo ane waxoditeloco apolicaganaga lapacegegi, ijaagijoa aagaga niidagawadi. ²⁰Odaa nigijo eijeegagi ane doide jogoniwilo, ijaagijo awitakegi anee me yelogoditedibece

Aneotedogoji lowooko, aneote inoa loenataka ane joxicagatema lodoe nigijo eijeegagi ane doide, aneote me ninaaletiniwace nigijo oko anodinanatece nibikotaxete nigijo eijeegagi codaa modogeteta niwilanigi anowo me liwigo. Odaa nigijo eijeegagi ijaagijo nigijo ane ninaaletiniwace oko oyokoletinece elagigi nelegi aneite noledi ane daga ipe, inaa gocilagadi ane lanicagawa aligopenaganegge logocilagadi lanigi. ²¹Odaa nigijo ane yeyagaticoace anoyaxawa nigijo eijeegagi ane doide me didele, nigidi bogonigodi oyatitigi nodaajo-ocagataga ane noditicogi nioladi nigijo ane waxoditeloco apolicaganaga lapacegegi. Odaa inoatawece ane ilaagaxodi oyeligo liboledi negepaa dagadiaagoyakadi moyeligo.

Icoa onaniteci miili nicaagape

20 ¹Jinadi ijo aanjo icogotibigimece ditibigimedi, ilokadi lakabakenaganagadi libato nigijo elagigi ane digicata liniogo, codaa eledi ilokadita ijo galeena ane iwaagadi. ²Odaa ja dibata nigijo eijeegagi ane doide, nigijo lakeedi oxiiigodi, nigijo Gowidi iniaagini diaabo, Satanás. Odaa nigijo aanjo ja niwilo icoatigilo onaniteci miili nicaagape. ³Odaa ja yokoletinece diaabo nigijo elagigi ane digica liniogo, odaa ja nibatoo, noxocotege, eotibige me dagadiaa yakadi me ninaaletiniwace noiigi nigeppaa ixomagatedijo nigicoa onaniteci miili nicaagape. Nige ixomagatedijo nigicoa onaniteci miili nicaagape, odaa dinikanawaanigitice, pida aleegi, onateciigidiwa nokododi.

⁴Nigidiaagidi ja jinadi idiwa baancotedi gonegaga. Odaa nigidi anonicotelogo odibatege nagatetigi moiwi codaa modiigenataka moiloikatidi oko. Eledi jinadi liwicidi nigijo anonakagidi lotoinagatedi leegodi moyelogoditibece anewi ane nikeetedogowa Jesus, codaa me lotaga Aneotedogoji. Nigidi agica dogoiwenigide nigijo eijeegagi ane diojo, otegeaagaga nigijo niwilanigi anowo me liwigo, codaa agaca nibikotaxete latocolo migetaga libaagadi. Opitace me newiga, odaa ja niigenatakanaga ijaa Cristo, nigidiwatigilo onaniteci miili nicaagape. ⁵Nigida noko, odoejegi noko me newigatace émagaga, pida aginoatawece émagaga newiga. Idiwa eletidi émagaga baadaga newigatace nigeppaa ixomagatedijo icoa onaniteci miili nicaagape. ⁶Ninitibigiwaji nigina oko ane odoejigipi me newigatace. Aneotedogoji iomagaditedicoace nigidi oko mepoka nepiliditeda. Odaa némaga agaleegica loniciwagateloco, agalee nigo. Icota mida nagatetigi mowote libaketedi Aneotedogoji iniaa Cristo. Odaa nigidi oko ja niigenatakanaga iniaa Cristo nigidiwatigilo onaniteci miili nicaagape.

Satanás aniadi

⁷Nige ixomagatedijo nigidiwa onaniteci miili nicaagape, odaa Satanás jogoikanawaanigitice moniwilo. ⁸Odaa noditice me ninaaletiniwace noiigi inatawece iigo, nigijo noiigi ane liboonagadi Gogue iniaa Magogue (one diitigi me lakapetedi Aneotedogoji). Satanás yatecogotee me iwitidege, odaa elioditigi micataga nigina dotiwadi, ane daga jakataga me jinilaagataga. ⁹Odaa ilaagiteloco inatawece iigo, oyawiile anei Aneotedogoji loiigi, codaa

me nagajo nigotaga ane lemaana Aneotedogoji. Pida noledi dinikatiogi icogotibigimece ditibigimedi, odaa yaagaditiogi nigidi anonawiile. ¹⁰Odaa diaabo ane ninaaletiniwace oko jogoyokoletioogi noledi nelegi micataga weiigi ane icogotediwece gocilagadi ane lanicagawa aligopenaganegge logocilagadi lanigi baanogoyokoleticogi nigijo eijeegagi ane diojo, ijaagijo ane diwitaka anee me liotagi Aneotedogoji ane yelogoditedibece lowooko. Odaa idiokaanaga limedi me nawikodeega, noko codaa menoale.

Ica owidijegi nawikodigi

¹¹Odaa ja jinaditace nagajo baanco gonege, yapacaga. Odaa jinadi Niginiwa ane nicotedeloco. Iigo codaa me ditibigimedi ja ialetibigiwaji me idei lodoe, odaa agaleegicoa. ¹²Odaa ja jinadi nigijoa émagaga, ijoa gonegaga, ijaagijoa iwikodadi, dabiditiniwace lodoe Aneotedogoji. Odaa jogoyomoke ijoa lotaganagaxiidi Aneotedogoji. Nigidiaagidi jogoyomokeeledi notaganagaxi, nagadi notaganagaxi iwotelogo liboonagatedi nigijo anidioka limedi me newiga. Odaa Nigijoa ane nicoteloco nibaanco gonege ja iwi ane loenataka émagaga ane diniditelogo notaganagaxiidi. ¹³Nigidiwa émagaga oicogotinigi akiidi-eliodi, apiigotedi, codaa aneiticoace émagaga. Odaa iditawece oiwi oninitecibeci nigica ane loenatagi. ¹⁴Odaa ja ma némagaga codaa aneiticoace ja ma, oyaladiticogi midataga noledi libegi. Nigida noledi libegi joanigidaagida nigicaeledi godemaga ane digica liniogo. ¹⁵Nigijo ane digica liboonagadi me diniditeloco nagajo notaganagaxi ane diniditeloco liboonagatedi nigica anidioka limedi me newiga, nigini oko oyokoletinigi nigida noledi libegi.

Ica gela ditibigimedi icaagica gela iigo

21 ¹Odaa ja jinadi gela ditibigimedi codaa me gela iigo. Leegodi nigijo odoejegi ditibigimedi, ijaagijo odoejegi iigo agaleegicoa, codaa me akiidi-eliodieledi agaleegica. ²Eledi jinadi ani nigotaga Aneotedogoji ane yoe me nebi, gela Jerusalém, ane icogotibigimece ditibigimedi miniwataga Aneotedogoji. Jaganadí codaa ja igo macataga nagana awicije ane wado, odaa ja nibeotege me dakapetege lodawa. ³Odaa ja jajipata ica ane igedi me dotaga digoida ditibigimedi, mee, “Digawini!

Ligeladi Aneotedogoji idei minataga nigina oko,
 odaa noiigiwepodi,
 ja loiigi.

Iniaaginiwa Aneotedogoji ideite miditaga,
 codaa me Noenogodi.

⁴Iwilegitetema icoatawece latiidi.
 Codaa agaleegica ane yeleo,
 agica ligecagalogo,
 agaleegica daga noenaga,

codaa agaleegica anoilee.

Leegodi nigicoa jotigide anee ja ixomagatedijo.”

⁵Odaa Aneotedogoji ane nicotedeloco nibaanco me gonegegi mee, “Inoatawece jigelagatidi.” Odaa meetediwa, “Idiitedini niginoa yotaga leegodi ewi, codaa nigina oko oyakadi monakato.” ⁶Odaa meetediwa, “Inoatawece ja igo. Ee odoejegi, codaa mowidijegi, leegodi jegemaga yoenataka inoatawece, codaa ja jigodi inoatawece. Nigina ane yeloadi ecibi jajigota ninyogodi ane daga gonoojedi, aneo oko me dagadiaagica liniogo me yewiga. ⁷Nigina ane igeke ane beyagi, dibatege inoatawece meetaga. Odaa Ee Noenogodi, codaa nigini ionigi. ⁸Pida nigina ane dagaca laalegena me notici, codaa nigina ane digica me idinakato, codaa anowo ane napioi ane godogolota, codaa gonematagododi, codaa nigina ane loomatewa okanicodaagica oko, inoa oxikonagaga, inoa anodaagata niwicidi, inoa awitakaga, iditawece nigidi idei nigica ane leeditibige me iticoace midataga noledi libegi aninoa gocilagadi ane lanicagawa aligopenaganenege logocilagadi lanigi. Nigica anei owidijegi némaga ane digica liniogo.”

Aca gela Jerusalém

⁹Odaa onijoteci nigijoa seete aanjotedi anonolitedi nigijoa seete baxiatedawaanaga ane nolee nigijoa owidijedi nawikodico jegenagi meetaga, meetiwa, “Anagi, jikeetagawa nagani ane gela me wado, lodawa Waxacoco.” ¹⁰Odaa ja dakatiwigiji Aneotedogoji Liwigo, ja idadeegitibeci, odaa nigijoa aanjo ja yadeegi iwigo, yadeegitibigimece ditibigimedi ani wetiga ane leegitibigimece. Odaa ja nikeetiwa nagani nigotaga nelegi, Jerusalém ane yoe Aneotedogoji me nebi. Nagani nigotaga icogotibigimece ditibigimedi miniwataga Aneotedogoji. ¹¹Nagani nigotaga datale liciagi Aneotedogoji me datale, codaa datale macataga aca wetiga ane igeditice ane diniwaloe, liboonagadi “Jaspe”. ¹²Idi niwilanigi ane nioata nagani nigotaga, leegitibigimece codaa me nelegi. Idoa dooze lapoaco, idiaa dooze aanjotedi oyowie nigidoa epoaco. Odaa nigidoa epoaco diniditeloce liboonagatedi nigijoa dooze lionigipi Israel. ¹³Idoa itoatadigida epoaco digeticogi nigoi, itoatadigida digetege niocodi wajenaga, itoatadigida digetege niocodi niwetaga, itoatadigida digetege gocidi. ¹⁴Nigidi niwilanigi ane nioata nagani nigotaga oipodegeteloco dooze wetiadi. Nigidiwa wetiadi diniditeloce liboonagatedi nigijoa dooze liigexedi Waxacoco.

¹⁵Nigijoa aanjo ane idotaganenege ida libikotanaganagadi oolo lajo me ibikota ane lica nagani nigotaga, lapoaco, codaa me nigidi niwilanigi. ¹⁶Nagani nigotaga diniwokodagaxiide, idoatawece liwailidi idokida ane locagatiigi. Nigijoa aanjo ibikotata nigijoa libikotanaganagadi odaa locagatiigi dibata iniwata miili nigigo iniwata taalialoomito (icoa romaanotedi libikotanaganenegegi bogone dooze miili.) Idokida ane locagatiigi moibikota liwailidi codaa me locagatiigi migo ditibigimedi. ¹⁷Nigijoa aanjo eledi ibikota nigijoa niwilanigi, odaa dibatalo 64 meetilo (romaanotedi libikotanaganenegegi bogone 144), pida nigijoa aanjo бага ibake ane gobikotanaganenegegi. ¹⁸Nigidi niwilanigi oyatita aca wetiga ane

diniwaloe moyoe, ane liboonagadi “Jaspe”, aniaa nigotaga moyoe oyatita oolo ane igeditice macataga galaapa. ¹⁹⁻²⁰Niwetiadi lipodagaladi nigidi niwilanigi onadinegeta inoatawece ane latopaco wetiadi ane diniwaloe. Nigicoa wetiadi anoibake, liboonagatedi Jaspe, Safira, Ágata, Esmeralda, Sardônio, Sárdio, Crisólito, Berilo, Topázio, Crisópraso, Jacinto, Ametista. ²¹Nigijoo lapoaco one dooze pérola. Onidatecibeci epoagi one onaniteci aca pérola. Odaa niladigodi nagani nigotaga one oolo ane yapidi, ane igeditice macataga galaapa.

²²Agica jinadi manitaga nagani nigotaga digini epaa ligeladi Aneotedogoji. Leegodi Goniotagodi Aneotedogoji anida eliodi nimawenegegi iniaa Waxacoco yelogotibigiwaji okanicodaagica ane liwai nigotaga. (Joanigidaa leegodi me dogoyopotibige ligeladi anei modogetetiogi). ²³Nagani nigotaga ayopotibige aligege otegexaagaga epenai me naloteloco, leegodi Aneotedogoji aneliodi me datale, nalotedeloco, codaa natalaga ane icogotigi minitaga Waxacoco yatalagadi nigotaga. ²⁴Odaa nigijoo noiigi anidioka limedi me newiga ewaligitibigiwaji me datalagateloce nagani nigotaga. Odaa niginoa inionaga-eloodolitigi nigina iigo onadeegita niliicagajetecidi nagani nigotaga moiwenigide. ²⁵Lapoaco nagani nigotaga idioka limedi me domoke idatawece noko. Adinoxoco leegodi agaleegica enoale. ²⁶Odaa noiigi onadeegita nagani nigotaga niliicagajetecidi monelecatagee codaa moiwenigide. ²⁷Odaa adakatio nigina oko aneo ane beyagi, otegexaagaga nigina ane noomatewa okanicodaagica oko, otegexaagaga awitakagaga. Idioka dakatiobece nigijoo anidiwa liboonagatedi me diniditeloce lotaganagaxi Waxacoco, aneite liboonagatedi nigica baanaga idioka limedi me newiga.

22 ¹Odaa nigijoo aanjo ja nikeetiwa akiidi ane yapidi ninyogodi aneo oko me newiga agica liniogo. Nigidi akiidi icogotiwece nibaanco Aneotedogoji iniaa Waxacoco. ²Codaa nigidi akiidi yakagiditeloco liwigotigi niladigodi nagani nigotaga. Liniogotibece nigidi akiidi, idiwa nialeli etaye aneo oko lewiga. Yajigo dooze latopaco elali inoatawece nicaagape, oniniteci epenai ida ane latopagi elali. Codaa laamotiidi nagada niale lajo me icilatidi noiigi. ³Agica gaantokaagini ane beyagi catiwedi nagani nigotaga. Leegodi nibaanco Aneotedogoji iniaa Waxacoco ide manitaga nagani nigotaga. Odaa liotaka odogetetalo leegodi niginoa libaketedi anowotema. ⁴Odaa onadi Aneotedogoji latobi, codaa Liboonagadi Aneotedogoji diniditeloco latocolo nigina oko. ⁵Odaa agaleegica enoale, codaa agaleegoyopotibige noledagaxiidi otegexaagaga aligege, leegodi Goniotagodi Aneotedogoji jiginiaa lokokena. Codaa liotaka aagaga niigenatakanaga oyaxawa Aneotedogoji. Idioka limedi me niigenatakanaga, agica liniogo.

Ica lanokegi Jesus

⁶Odaa meetiwa nigijoo aanjo, “Niginoa notaga ewi, codaa me yakadi me jinakatonaga. Goniotagodi Aneotedogoji, anepaa iomagadititema mepoka nepiliditeda nigijoo ane yelogoditedibece lowooko, iige niaanjo me ikeetiogi liotaka nigica anicota micota anigida noko agalee leegi.”

⁷Jesus meetediwa, “Diganajipaatiwa! Janagi agica daga leegi. Odaa ninitibigiwaji nigina anoyiwagadi lotaga nagadi notaganagaxi ane ikee nigica anicota anigida noko.”

⁸Ee João jajipata codaa me jinadi nigicoa anicotalo anigida noko. Naga ixomagatice me jajipatiogi codaa me jinadi nigijoa anica ina daga igeedi, odaa ja idakagitini lodoe nigijo aanjo ane nikeetiwa anicota anigida noko, odaa ja domaga jogeteta. ⁹Pida meetiwa, “Jinogogeetetiwa, akaami iciaceekawa ee liotagi Aneotedogoji, codaa me ee gadokaagedi mabaa, codaa me ee lokaagedi ganioxoadipi anoyelagoditedibece Aneotedogoji lowooko, codaa minatawece anoyiwagadi lotaga nagadi notaganagaxi. Ogeetetalo iniokiniwateta Aneotedogoji!”

¹⁰Meetiwa nigijo aanjo, “Jinagagatitedini ane lotaga nagadi notaganagaxi anoditece nigica anenagi, leegodi nigica noko nigicotece niginoa ananati ja nipegi. ¹¹Nigina oko ane beyagi, dioki epaageo ane beyagi, nigina aneo ane napioi, dioki epaageo ane napioi. Nigina oko anele, dioki epaageo anele, codaa nigina Aneotedogoji ane iomagaditedice mepoka nebiteda, dioki epaa diniomagaditice.”

¹²Jesus mee, “Digawini! Aleegi odaa janagi. Jinadeegi ane igenaga me dibatege oninitedibeci oko, loojedi nigicoa ane loenataka. ¹³Ee odoejegi codaa mowidijegi. Leegodi jegemaga joe nigijoa odoejedi aninoa, codaa jigodi inoatawece.

¹⁴Ninitibigiwaji nigina anowote ane liigenatakanegeco Aneotedogoji, leegodi yajigotediogi moyakadi moyeligo ela nagajo niale aneo oko lewiga ane digica liniogo, codaa yajigotediogi moyakadi modakatiwece lapoaco nagani nigotaga. ¹⁵Pida ideiticoace wetice nigotaga, niginoa abeyacagaga ane daga nepiliditeda Aneotedogoji, inoa oxikonagaga, inoa ane noomatewa ane daga nodawa, inoa gonematagododi, codaa nigina anodogeteta niwicidi, codaa nigina anoninaaletiniwace eledi oko leegodi lotaga codaa ane loenataka.

¹⁶Ee Jesus, jiniige iniaanjo me yelagoditagawatiwaji niginoa yotaga anewi, anakaami seete lapo loiigi Aneotedogoji ane gadigeladitiwaji nipodigi Ásia. Ee Nigijoa anida aneetege licogegi inionigi-eliodi Davi. Iciagi nagajo yotedi nigoiije ane datale.”

¹⁷Aneotedogoji Liwigo aniaa nagajo anicota me wado modi, “Anagi!” Odaa nigina anowajipata nigida ligegi eledi modi, “Anagi!”

Ane gadeloati ecibi, anagi! Codaa anemaani macipe, acipe ninyogodi ane ganogeedi, ninyogodi aneo oko lewiga ane digica liniogo miniwataga Aneotedogoji!

Owidijedi notaga

¹⁸Ee João jao gadeemiditiwaji anajipaatalo lotaga nagadi notaganagaxi ane ikee anicota anigida noko. Nigica ane ixotiwece eletidi notaga nagadi notaganagaxi, Aneotedogoji yajigote lawikodico, nawikodico aneetece nagadi notaganagaxi. ¹⁹Nigica ane nogatedice notaga aniwoteloco nagadi notaganagaxi, notaga anoikee anicota ganigida noko, Aneotedogoji noga me yakadi me yeligo

nagajo niale ela aneo oko lewiga ane digicata liniogo miniwataga, codaa me noga me yakadi me dakatiwece nigotaga Aneotedogoji anepoka nebiteda, domaga nimawenegegi me yakadi diniditeloce nagadi notaganagaxi.

²⁰Nigijoa ane yelogodi niginoa notaga anewi aniwoteloco nagadi notaganagaxi mee, “Ewi me daga leegi, oada ja janagi.” Jigidaagee! (Amém).

Anagi Goniotagodi Jesus!

²¹Jemaa Goniotagodi Jesus meliodi meletedagadomitiwaji. Oada jigidaagee! (Amém).